



FEBRUARY 2025

VOLUME 65 | NO. 02

# Christian Thukizakna



**Ki-It Tuahna Lampi A Pai Gingtu**

**EDITORIAL BOARD**

**Editor**

Rev. K. Kamchinkhup

**Managing Editor**

Rev. M. Zalian Guite

**Contributing Editors**

Rev. Thawndoulion  
Rev. Nenglian Vualnam

**Production Managers**

Rev. V. Thangkhanmuan  
Upa T. Paukhansiam  
Mr. Mangthianlal Samte

**Circulation Manager**

Upa K. Jamchinthang  
C/No. +91 8837208598

**Design & Setting**

Upa Khuplaljem Guite

**LAKMAN:**

Kum khat ₹ 150.00  
Dak ah ₹ 200.00  
Bu khat ₹ 15.00

**CONTENTS**

1. EDITORIAL	: 01
2. I LAMPITE ENCHIAN NI	: 02
3. JABOK LUIGAL I KAIDING UH AW!	: 06
4. SUICIDE: THEISIAM IN, DOUDAL NI	: 08
5. BIBLE STUDY	: 16
6. GAMMIAL AW	: 21
7. DORCAS CORNER	: 24
8. YOUTH CORNER	: 26
9. CHILDREN’S CORNER	: 28
10. EBC INNSUNG THU	: 30
11. THU TUAMTUAM	: 35
12. ORDAIN SUNNA	: 36
13. KIPATHU GENNA/ THUMNA DINGTE	: 39

**Thusuah ding piakna:**

Editor,  
Khristian Thukizakna  
Dorcass Hall, P. O. Box - 6,  
New Lamka,  
Manipur - 795006, India.

*Thusuah sung-a kigente  
Evangelical Baptist Convention  
Saptuam ngaihdan a hikim kholkei.  
Thusuahte’n amau thusuah ah moh a  
pawtek ding uh.*

## TOUPA JESU KHRIST LEH AMAH KROS LOU NGAL

**K**hristian Thukizakna simtute teng Toupa Jesu Khrist min in Kchibai!

Pathian saptuam, i deihtoh tak Evangelical Baptist Convention a mohpuakna thak len dia thu hong om apan in hiai bible chang ka lungsim ah ahong om mahmah hi.

"Unaute aw, Pathian thuguk nou honhilh ding a na kiang ua ka honglai in thugen thupi leh pilna thupi toh ka hongpai kei hi. Jesu Khrist, amah mah kilhden a om thu kia loungal nalak uah bangmah theih ka tum kei hi. Hatlou leh lau in, nakpitak a ling kawm in nalak uah ka om hi." 1 Korinth 2:1-3

Sawltak Paul in Greek khopi lian Korith khua ah Toupa'n mohpuakna a piak sem dia a kuanlai a alungput agelh ahi. Paul in mihing bang a kisialna ding gen hileng chi a agelh sekte kisaktheihpihtham kisinsiamna, dinmun leh thiltuah thupi taktak ahi. Huai dungzui in, khovel dan hileh Korith khua a amohpuakna sem dia akuan dek a "Hatlou leh lau in, nakpitak a ling kawm in nalak uah ka om hi" achi, thumkhah huai abang hi. Aman a laikhakte ah hatlouna nei ahihna imlou in taklang zaw hi. Hatlou leh mikhial, hepihna zia lelel a hotdam ahihna kiphawk a Toupa hatna masuan a aom theih a hatna thuguk ahizaw chih a Chiang mahmah hi. Hiai thu amah Chiang mahmah ahihman in, a mimal hinkhua hileh a nasepna ah Jesu Khrist lou suan ding neilou ahihna kimuchiang mahmah hi.

Paul bang lou in hatna neilou mihingte himahle hang, khat veivei hatlouna neilou dan a kigen leh kilat i utdan ahi nakkhem hi. Hatlouna i neih pen buaihuai hizaw lou in, hatlouna neilou kisakna hiam huai dan a kikoihna pen a buaihuai hizaw ding hi. Mimal ah, mihing gam a gen a Sawltak Paul in kisialna ding a gente bang leng neilou kihi ahihna ah, mohpuakna tuak sep ding naksem in a lauhuai hi.

Himahleh Paul in, huai bang dinmun ah "Jesu Khrist, amah mah kilhden a om thu kia loungal nalak uah bangmah theih ka tum kei

hi" na chi hi. Mihing hatlounhna leh huai ziak a lauhna leh linna pen huaitan kia a khawllou in, 'thildang theih ngailou' chikhop a muanhuai, Toupa Jesu Khrist leh a Kros thuguk i kingaktheihna omsun ahi. Paul bang a, hiai thu adikna leh amuahhuaina phawk a tupmawng a hiai bang lungput neih ding i kipiakna leh thumna ahi.

Jesu Khrist mahmah in "a niteng kros pua a hon zui lou ka nungzui ahitheikei ding" a chih bang in mihing mihinna hatlou kilhden a Pathian Pathianna masuan a nasep pen Pathian deihdan ahizaw hi. Sawltak Paul bang a hatlouhnate kiphawk a "Jesu Khrist, amah mah kilhden a om thu kia loungal nalak uah bangmah theih ka tum kei hi" chih masuan a semthei ding in thumna a kiphawk in, kalsuankhawm ni.

Amah a kipan leh amah ziak leh amah ading in thil tengteng a hongom ahi ngal a; amah kiang ah tangtawn in thupina om hen. Amen. (Romte 11:36) ■

---

## “I LAMPITE ENCHIAN NI”

- *Kahlate 3: 40.*

- Pastor Dr. V. Ginsianthang, *EBCC Thingkangphai*

**T**HUMASA- Hun haksapi tuak a gal leh sa laka khosa himah lehang, Pathian hehpihna ziak a February, 2025 melmu thei leh maban sunzom thei zel a Toupa'n hon omsak ziaikin i kipak mahmah hi. Hiai tan i tun theihna bang dang ziak hilou in Pathian itna, hehpihna leh lainatna zuaungeilouh ziak ahihman in Pathian thupina pia in kipahtu i gen hi! Huai hikei leh hondoute sukchimih leh nawmvalh a omkhit theih luat ahi! Hichibang dinmun haksa a om leh, maban theihhaksapi a khosa i hihman in i lampite enchian a, Toupa kianga kiknawn apoimoh pet mah hi. Huaiziak in, tu kum saptuam thupi: “I LAMPITE ENCHIAN NI” chih pansan in saulou houlim lehang la, bangchi bang Lampi tawna paikha mah i hia chih kivelchian chiat in, michih in Toupa deihlam zong in Amah kiang ah kiknawn lehang uthuai i sa mahmah hi.

## A. THUMAL POIMAWH DEUHTE GENCHETNA

1. “I” chih thumal sappau a “us” lehna ahi a, min tanga kizang thumal, mi khat sanga tamzaw genna ahi (objective personal pronoun plural). Hiai thumal in i tangtel a lampite enchian ding tuh “mi tengteng” i.e. Jawlneite, Siampute, Kumpite, nu leh pate, tuailaite, naupangte ahuam vek a, kuamah apeng thei omlou chihna ahi. Hiai in inkuan, khosung, gamsung leh saptuam a siatnate ah kuamah apeng thei, mohpaw khalou omlou ahihdan hon ngaihtuah sak hi!

2. “LAMPITE” chih in leng thil tampi a tunkha hi. Mawltak a gen in Lampi tuh tunna ding zotna ahi a, lampi i gen Chiang in lam lian, lam neu/kawchik, lam kawi, lam tang, lam suk, lam tou chihte i omsak hi. Himahleh, i tangtel a “LAMPITE” kichi tua bang lampite genna ahikei hi. Strong’s Bible Dictionary in “Lampite” tuh “hinkho pumpi huam” (course of life) ahihkei leh, “nasep silbawl dan” (mode of action) chi’n a hihhchian hi. Huaiziak in, i tangtel a “LAMPITE” chih in ahuam theih anuai ate ahi:

a) *Pathian pomdan/koihdan (concept of God)*. Pathian ahihna bangtak in i thei hia? Ahihna banga it in, lau in, i muang hia, chihte kivelchian ding ahi.

b) *Pathian biakna toh nasep leh lungput (worship motives and practices/activities)*. Kha leh thutak in Pathian i bia hia? I biakna thilhihte - thugen lasak, thumna leh thilpiakte Toupa dia gim namtui leh pomtak ahi diam? Lungtang tawng apan suak hilou biakna nasep/thilhihte Pathian adia pomtak hilou, kihhuai hizaw ahi!

c) *Inkuan, khotang leh gamsung kivaihawm dan/paidan (social and political systems)*. Heutu, makai leh vaihawmte’n Pathian dan leh thupiak bangin vai i hawm hia? Thunei leh vaihawmte’n mipite tan dia kilawmte i pia hia? Mipite’n i mohpuakna e.g., siah leh fee tuamtuamte diktak in i pia hia? Kitel hun in diktat in vote zong in i khia hia? Numei-pasal kal ah Pathian dan leh thupiak i zui hia? inkuan ah nu leh pa, zi leh pasal, ta leh tute’n Pathian dan leh thupiak I zui hia? Hiaite khawng ahi Jeremia in i lampite achih!

d) *Nek leh tak, silh leh ten, neih leh lam, sum leh pai, pilna leh siamna toh kisai (socio-economic system)*. I nek leh dawnte, neih leh lamte, pilna leh siamnate'n Pathian a pahtawi hia? I sep leh bawlte'n Pathian a pahtawi hia? chihte ki-etchian ding ahi.

e) *Thil etdan/tehdan toh kisai (Value system)*. Pathian in thupi a chihte i koppih thei hia? Pathian in a huatte i huatpih thei hia? Diktatna ziaka gilkialte hampha i chi thei hia? Lemna bawlte a hampha i sa taktak hia? chihte kivelchian ding chihna ahi.

Hiai atunga i taklatte ah Pathian deih leh deihlough ban ah hon thupiak a om chiat hi. Gingtute tuh khovel dan bang a omlou ding; tua naksanga sep leh bawl, omdan gamtat, nek leh dawn ban a i pumpi mahmah toh Pathian pahtawi ding a thupiak i hi (Phil 1: 27; Rom. 12: 2; 1 Kor. 6: 19 – 20; 10: 31). Bangteng in pil kisa in, siam kisa in, hausa kisa lehang leng, Pathian deih leh thupiakte i zuih kei leh Pathian vaihawmna lauhuai mahmah maituah hun om ngeingei ding

chih mangngilh lough ding ahi (2 Kor. 5: 10).

3. "ENCHIAN" chih, John Wycliffe in "heart-searching" chi'n a hihchian a, huai tuh lungtang a geelte zongsuah chihna bang ahi. Lungtang a geel leh ngaihtuahte adiklough chia omdan gamtat a hong kilangkha ahizhiak ahi. Pumpi a damloughna theihchetna dia test tuamtuam bawl ahih bang a, i lungput, omdan gamtat leh nasepte adik leh diklough Pathian thutak Laisiangthou zanga etchian zel ding ahi.

**B. TOUPA LAM AH KIKNAWN NI:** I lampite etchian zoh Chiang a kimohsak, kingaisia, kingohtuah ding hilou in, Toupa lam a kiknawn ding chih ahi. Jeremia hun a Israelte'n leng a khelhna ziak un Pathian vaihawmna thuak mahle uh, Pathian kiang a hongkik Chiang un hehpihna hau Pathian in ngaidam in a tungding thak zel hi. Eite zong Israelte bang a helhat, Pathian dan leh thupiakte zuilou a khial sekte i hi. Tuaziak mah a namai lou buaina leh haksatna mimal, inkuan, khotang leh gamsung in tuak zel i himah mah hi! Hileleng, Pathian lam

ah kik lehang, Ama'n hon ngaidam dia, hon damsak in hon tungding thak ding chih i tangtel in hon sinsak ahi. Ahihleh Toupa lam a bangchi kiknawn ding i hia?

1. KISIK DING AHI. Hotdam a omna ding leh pukna apan tunding a omna dia poimoh masa tuh kisikna ahi (Mat. 3: 2; 4: 17; Kil. 2: 5). Kisikna diktak tuh khelhna tawpsan a Pathian kiang zotna, lungtang leh omdan gamtat kikhekna ahi. Kisik taktak lou a piangthak a kikoih thil phatuamlou leh lauhuai mahmah ahi. Pathian in kha khasia a kisik tuntunte a hehpih a, a ngaidam a, a tungding zel hi (Sam 34: 18; 51: 17; Is. 57: 15). Huaiziak in, kisik in i khelhna tawpsan vengveng in Toupa lam ah kinawn ni!

2. TOUPA' DAN LEH THUPIAKTE ZUIH DING AHI. Khelhna kisik a Pathian i naih

leh a dan leh thupiakte zuih ngeingei ding ahi. A dan leh thupiakte zuilou a Pathian it chih tuh zuauman ahi! (Joh. 14: 15f). Biakin kai gige, Bible sim gige, Thumna hinkhua, thohlawm leh thilpiak dangte piak, midangte it, Khrist theihpihtu a pan chihte Toupa lam a kik hong kilatkhiatna ahi uhi.

**THUKHITNA** – Michih in i lampi zuih uh enchian thak ding ahi. Ei ngaih a dik leh hoih mahmah, hileleng Pathian dan toh kituak hetlou omkha ding ahi. Huaiziak in, i lampite zong in enchian ni. I zuih lampi dikna or diklouhna kiteltak in theichian ni. Midangte awlmoh a hoih lailai in, eimah mah kiawlmoh masa in, i lungput, omdan leh gamtatte enchian in Toupa lam ah kinawn ni. Tua bang dingin simtute Toupa'n hon vualzawl chiat hen! ■

**EBCC LUNGTUL (L) BIAKIN MUN THAK DING A SUNGPHUMNA:**

EBCC Lungthul (L), Singngat Division Biakin mun thak ding December 21, 2024 dak 8:00AM in Lungthul khua ah Rev. Dr. S. Vung Minthang, General Secretary in suangphum phum hi.



## JABOK LUIGAL I KAIDING UH AW!

Rev T Thangzasiam, DS Thanlon

*Sutzopna...*

Mihingte'n haksatna tuamtuam i tuahzelte khalam subject banga simding ahihlai in, salam subject a sim in sukfel i sawmkha sek ua, i buailoh deuhdeuh uh hilou hiam ka chi ahi. Jakob in a Esau anaih deuhdeuh leh alau deuhdeuh a, a thawmhau deuhdeuh hi. Huchiin aneih alam tengteng luigal akaisak nung inleng aman tuh a kan ngam tuankei a, Jabok luipang ah a zi leh tate toh zansawt hun pen zang uhi. A lungsim puakgikte lah a zi leh taten apuakpih theikei ua, a mangbatnate leng a houlimpih theikei uhi. Jabok lui luangging bolhbolh kal ah mitkhitui pak niaunuau toh ngaihmuang loutak in a om maimah hilou maw ! Atawp in Jakob tuh "Jan in a thou a, a zi nih leh, a sikha nu nihte leh a ta sawm leh khatte a pi a, Jabbok lui ngahna ah a pita a. Huchiin, amau a pi a, lui a kan ua, a neih tengteng leng a kansak vek hi (Gen 32;22-23)" achi a. Jabok luigal kaita hi. Toupa min phat in om hen.

**JABOK LUIGAL AH PATHIAN TOH!** Toupa'n a kiknawna

ding a asapna gamchiam Jabok luigal a kainung in, Jakob in bang ahih masapen dia ? chih ngaihsut tham ahi. Laisiangthou in 'amah kia in luipang ah a om tuam a', achi hi. Tua luigal ah alungngaih mangbatnate ziak a hatna himhim neilou a omlai tuh, mihattak Pathian Angel in a kibuanpihta hi. Huaileng tomchik sung kibuan hilou in zan khovak (*Best of khovakma tan*) a kibuan uh chih kimu hi. Huchiin zoulou chih akitheih ziakin Jakob pheipi guhtuah a suklawisak nung in: "Na min bang ahia ? achia, Huan aman Jakob achia. Na min Jakob ah nawnta kei dinga, Israel ahon chi zawta ding uh. Pathian leh mihing na buan a, na zouta ngal a, achia (Gen 32;28)" achi hi. Jakob min tuh "Israel" chia kheksak in a paisanta chih ahi. Adiktak a gen in Jakob tuh mi kisatheitak ahia, mi kideihkhop leh zuaugenpa, khempa chia theih ahi. Himahleh hiai Jabok luigal ah Pathian in a kisak theihna tengteng asuk "zero" sakvek a, huaimun min dingin



“Penial” Pathian a maitang a ka muhziak in chiin aphuak hi.

Ahun masa ah Jakob in Pathian a mukei a, a lungngaih mangbatnate salam vaitak in sukfel sawm sek mahleh, a haksatna pung deuhdeuh hi. Jabok luigal (*Peniel*) a Pathian hon maituah chiang in Pathian in a kisaktheihna leh mihinna tengteng a kaihniamsak vek in, bangmah ahihlough dan kimuchiansak hi. Huai hun akipan a lungngaih mangbatna tengteng khalam subject bangin sim siamta hi. Jakob tuh hong kimu chiang semsem in “*Jakob in, Na sikha tunga hehpihna (vualjawlna) na muhsak tengteng laka, a neupen leng mutak ka hi kei hi; hiai Jordan lui ka chiangkun kia toh ka kan a; tuin jaw pawl nih hial ka hong hita hi*” (*Gen 32; 9-10*)” achi khe hial hi. Nidang in Jakob tuh misual, zattak louh leh vualjawlna tangtak loupa ahi. Himahleh Pathian in Jabok luipang (*Penial mun a*) a khoihbai zoh chiangin a hinkhua kikhek hi. A maituah ngamlouh a’ u-Esau tuh hon maituah a lauhna ding himhim om nawnkei hi, a kipom ua, a kitawp ua, a kapkhawm theita uh chih i simthei hi. Toupa phat in om hen!

**THUKHITNA:** Tunin inkuan ah haksatna genkhiak theihlough na tuak hia ? Nupa kal haksatnate, ta leh naute toh kal haksatna, khosakna toh kisai ahaksatna banah, taksa mahmah ah leng damtheihna toh kisaiin haksatna tuaklou ki-omlou ding hi. Chikmah chianga dam ngei nawnlou ding “*Diabetes*” nei bangzah i om ua ? A dam ngei nawnlou ding BP sang nei i tam mahmah uh. Kawngna leh tha-na gending i hauthei mahmah ua, a khente ngial tuh heart lam doctor naih gige ngai bang, kal (*kidney*) lam buai a khopi naih poimoh leng kitam petmah hi. Himahleh tuate tengteng Pathian in hon hihdamsak a utdan ahi kholkei a, huchi kawmkawm a amah i naih teitei a deihdan ahizaw kha ding hi. Hausatak a a gamna semdia hon deih ahi kei a, himahleh gentheitak a a nasem dia hon deih ahizaw kha mohkei ding hi. Tuabang dinmun a na om hun inleng “*Na Jabok mun*” ah kisungbua inla kisu-awng inla, na lungsim ngaihtuahna giktakte Toupa kiang ah sungbaw lechin hon hihdam ding hi. A

kitamkhamlou hinkhua zaw leigaw takpi, keu bekbuk toh kibang lel hiin a ngaihsut theih hi.

Paul in “Ni giatni a zeksum ka hi a, Benjamin nam, Hebrumi kholdiak, Danlam chileng Pharisai ka hih ban ah kho namai a kipan hilou ka hi’ (Phi 3:4-6)” chih lungsim a putlai tuh Pathian in zattak sa nailou hi. Huaiziak in Pathian mizat tampite Toupa mai a kitamkhamla, Pathian in Jakob banga a lawnbai sate ahi uh. Dan B. Allan in a laibu “Leading with a limp” chih ah Pathian in Jakob pheipi guhtuah a suklawisak mateng tuh zattak lou achi hi. Tulai a i poimoh pen uh theihna leh pilna ahi masa kei a, Pathian khoihbai, Khasiangthou lawnbai poimohzaw hiin ka

ngaihtuah khasek hi. Sapla minthang tak “*The heart of worship*” chihla phuaktu in “*I’m coming back to the heart of worship, And it’s all about you, It’s all about you Jesus*” achi bang in Jesu Khrist kiang i zuankik ding uh aw. Jakob in Toupa aw nang tellou in kei zero ka hi, ka siamna leh ka experience kisak theihpih mahmahte bangmah hilou ahi chiin, Jabok mun a akisunbuak a, a luankhiak leh vualjawlna in adelhzui hi “*Na sikha tunga hehpihna (vualjawlna) na muhsak tengteng laka, a neupen leng mutak ka hi kei hi*” (Gen 32; 9-10)” a chi khe hial hi. Tuabang hi thei ding in. Jabok luigal i kai ding uh aw chiin chouna k’on bawl hi. Toupa’ Khasiangthou in hon ompih chiat hen. Amen! ■

---

## SUICIDE: THESIAM IN, DOUDAL NI

- Chingngaihlian Tunglut

**T**humapi: Ei singtangmite i hihleh, kichimattak (*closely knitted*) in khotang ah i khosakhawm uhi. Asia-apha, anuam-ahaksa a phattuumngaihna toh kidelh leh kiuaptuah liailiaite i hi uhi. Hiaibang khotang i hihman un, suicide (mahni hinna kilaakna) toh kisai leng awlmohna lungput toh khotang vai a buaina dan in en thei le’ng, a doudalna dia khotang in manphatak a pan kila ding ahi.

**Suicide doudalna dia WHO leh IASP makaihna:** Suicide i chih Chiang in mi khat in amah deihtelna zang a, tupmawng a amah leh amah a hinna kilaak chihna ahi. Suicide ahiehleh, Lungsim Natna ataktak mah ahihdan taklangtu ahi.

Kum teng in, khovel pumpi huam in, September Ni 10 pen Mahni Kithahna Dalna Ni (World Suicide Prevention Day) in kizang gige hi. International Association for Suicide Prevention (IASP) leh World Health Organization (WHO) kithumuh a, haidan a panlakna a makaih uh ahi. Hiai ni in, a kum a di bik in thupi (theme) telkhiaksa mah pansan in, suicide toh kisai kiphawksakna (*awareness*) sai in om zel hi. Huaibang in, ei singtangmite khotang inleng, suicide doudalna dia pan i lak zel ding uhi ahi: Suicide toh kisai kiphawksakna (*awareness*) seminar ban ah, laigelh leh houlimna vantang khawng ah phatuam leh huhna pe di zawng a kihongtak a genkhiak zel poimoh hi. Huaidan hileh, suicide gendan leh muhdan hong kikhek dia, a ngeu-etna leng kiamsakna hong hi ding ahi.

Suicide leh Mental Illness (Lungsim Damlouhna) ngeu-etna (*stigma*) lian lua chih phetlou in, alangtang a gen phallouh (*taboo*) leh a sianglou hileh kilawm hial khop a koih in om hi. Huaidan lungput i neih ziak un, mahni hinna kilaak utna lungput buan lellelte'n panpihna zong utlou ua, a utte'n leng zong ngamlou uhi. Huchi ahihman in, apoimoh tenten uh huhna mulou di uh chihna ahi. Puksesah khovel ah, haksatna tuamtuate ziak a lungngaihna leh mangbatna tuak tou zel di i hihman un, suicide a sihna dal zoh sipsip hithei khol lou ding hi. Himahleh a doudalna dia pan i lak touh zel ding uh ahi; hinna hon pia Pathian ahihman in, ei hinna hi'n midangte hinna hitaleh, a kemtu ding a Pathian mai a mohpuakna neite i hi uhi.

**“Khotang damlouhna”:** WHO in a gendan in, suicide ahiehleh khotang damtheihna lunghimohhuai (*major public health concern*) ahi chi uhi. Huaidan ahihman in khotang damtheihna dia pan nasatak a lak poimoh ahi chi hial uhi. Aziak chu, suicide in miteng (alian-aneu, amei-

apa, khosakna tuamtuam leh dinmun tuamtuam) khentuam neilou in sukha vek hi. Suicide a sihna i chih thil mulkimhuai leh vangsiathuai ahihman in, sawtpi daih a, inkuan, lawm-le-vual kia hilou in, khotang leng thuktak in sukha hi. Huaiziak in, suicide toh kisai i gendan uh khek leng, i etdan uh leng kikhkek dia, a doudalna ah pan i lakdan uh leng a poimohte adia ahoihzaw lam leh phatuam di sukha di'n hong kikhkek ding hi.

WHO in agendan in, kum teng in mi Lakh 7 sang a tamzaw in a hinna uh kilaak in si uh a, suicide a si khat a omna lak ah mi 20 val suicide ana tum (*attempt*) om hi. Lamka toh kisai *data* leng en le'ng: NEST LAMKA in **suicide data** ana kaihkhawmna dungzui in, tukum July tan in mi 12 in mahni hinna la in sihna ana tuak uhi. Huai mi 12-te lak ah pasal 10 leh numei 2 ahi uhi. Hiai mi 12 lak ah a naupangpen kum 12 mi hi a, a upapen kum 57 mi ahi. Hiai *data* apat i theihsuah chu, a upa-a naupang khentuam neilou in, suicide in michih nawkkha ban ah, numeite sang in pasalte lak ah mahni hinna laakziak a sihna tuak tamzaw uhi.

Teltak a suikhiak zihzeh a om chu, *depression* nei numeite lak a tamzaw a, himahleh, pasalte *suicide* a si tamzaw nak uhi. Numeite'n a puakgik uh genkhia ua, kap leh maukhe zel ua, a phawkna (*emotion*) uh kibuntkhiakna dan khat neitheizel uhi. Huaiziak tak a, mahni hinna laak di lungput aneih Chiang ua le'ng, va taksuah khollou sek uh hi'n i ngaihtuah hi.

Ei lak chauh ah hilou in, khovel pumpi huap in, suicide a site lak a pasal tamzaw thamtham uhi. Bang ziak ahi dia? Pasalte'n haksatna a tuah Chiang un, a kipasalsak ziak un, a phawkna (*emotion*) uh hum chimit ua, puakgik pholhkhia klouh toh nungta sek uhi. Khotang in pasalte nehnou louh di leh haksatna khawng gen a kibungkhe lou dia a ngiat ziak in, pasal tampite adi'n pasal zoh huailou kisakna guan a, panpihna zong lou uhi. Panpih poimoh ahihlan uh leng, amau leh amau kipom lou phetlough in, midangte'n leng pom utlou uhi. Huaiziak in sung puakzak sek ua, puakgik luat ziak a om ngaihna theilou in, beidotna in pumbuah sek hi. Amau kia a athuak ban uah, mi theihshiam louhnate'n amau puakgik guan

behlap hi. Lamet bei kisakna ziak khawng in hin ningkitelna hon nei uhi. Huaichiang in, khenkhatte'n mahni hinna kilaak hial di khop in kikhin sek uhi.

### **Mi'n bang ziak a suicide hih sek uh ahi dia?**

1. Lungsim damlounhna / *Mental disorder* tuamtuamte (depression, bipolar disorder, autism, OCD, ADHD, schizophrenia, anxiety disorder leh adangdang) ziak.
2. Nupa kikal hiam, mi toh kikal hiam leh innsung buaina ziak.
3. Taksa damlounhna leh damtheih louhna leh kumlui natna neih ziak.
4. Khamtheih leh zu zongsatna (*addiction*) ziak.
5. Stress tuamtuam (sum leh pai a buaisiatna, lai sinna leh sepna lam a haksatna, bawlsiatna (*harassment*) leh simmohtak a ki-engbawlina (*bullying*), numei-pasallam a bawlsiatna/sualluihna chihte thuaklah ziak.
6. Gal ziak a haksatna chi tuamtuamte ziak in lungsim a liamna (*trauma*) nasatak mi'n tuak zel uhi. Huaite ziak khawng in leng mahni

hinna kilaak utna lungput taksuahna in zui thei hi.

**Singtamite dinmun:** Kum 2023 a kipat a Manipur gam buaina ziak in lungsim lam ah liamna miteng hon tun chiat hi. Adiak a gal ziak a tangtak (direct) a, sihna, liamna, mansuahna leh haksatna chi tuamtuam thuakkhate leh galtaite lakkhawng ah lungsim a liamna nasa diak di'n i gingta hi.

7. Banghiam haksatna leh buaina tuahguih ziak a ngaihtuahna pe sau man ngellou (impulsive) a, kikhin gui a, mahni hinna kilaak mawk chih bangleng, tam kei mahleh, ana om uhi.

### **Suicide sepsuah di lungput a neite bangchi theih di?**

#### **Kampaudan ah:**

1. Sihna leh sihdan toh kisai thute khawng gengen.
2. Thuakgim leh thil puak haksa sak ziak a hin peihhuai nawnlou asakdan thute khawng gengen.
3. Lamet di omlou, phattuumna om kisalou, mahni kizumpihna liantak nei, dongkholh kisa, taangtheilou (stuck) hileh kilawm a kitheihna,

thangpaihna thute leh mi a dia puakgik guantu lel dan a kingaihtuahna thute khawng genen.

### **Omdan ah:**

1. Si dia lemgeelna (plan) nei. Sihna toh kisai internet khawng ah suut ahikhei leh kuahiam kiang ah dong.
2. Lawm-le-vual thuah ut nawn lou, kidangkoih, mangpha khakna khawng nei mawk, amah mimal van deihluat khawng mi pia, ban ah, a sih nung chiang a vai di sai khawng a buai.
3. Lauhthawnghuai thil khawng hih. Etsakna'n: Gari hat pipi khawng a hek vutvut; liamna/sihna tuah di khawng poisa lou hileh kilawm a khosa.
4. Mood swings, huai chu mood fuhlou tak a a-omlough kaal a mood fuhlou bang a om. Akhen chiang a phe velvul, akhenchiang a nguaitak a om.
5. Nekdan kikheng; Ngeina dan bangloutak a tampipi ne ahikhe'h tawmchik ne, ahikhe'h ne ngeilou. Ihmutdan kikheng; Ihmu tam ahikhe'h ihmu ngeilou.
6. Zu leh Khamtheih hihngeilou khawng in hih. Ahiksa ahik leh hih uang diak.

7. Suicide tum khenkhat, a taksuah ma ni bangzah hiam khawng mood fuhtak leh thovengtak dan khawng in om uhi. A hinna uh toh kiton a, a haksatna uleh gimthuakna ua pat suakta ta dia kikoihna aneih ziak uh ahi.

### **Suicide bangchi doudal ding?**

Suicide a mulkimhuaitak a sihna tam mahleh, a doudal dingdan leng om tham hi.

1. Mimaltak a pan i laktheihdan ahikheh, i kiim-kiang ah inkuante hiam, lawm-le-vualte lak ah khongei ngaitak in om ni. Suicide lungput neite paudan leh omdante khawng thei in, huaidan a mi a hong om chiang un ana phawk leng, panlakkpih dan hong om ding ahi.
2. Kuahiam in huaidan lungsim pu a i theihleh, amau kia a omsaklough di, amau leh amau a kihihlup/hihsiat theihna di ua vanzat leh hiamhei thilte hepkiak a, munbit a omsak ding ahi. Room tuam aneih uleh, kilh theihlough a kongkhak koih di. A haksatna uh ngaihkhik a, hanthawanna leh thuumsakna khawng neihsak diing. Limsak leh vil

- bawl diing. Kihuihkhe dia tonkhiakpih diing ahi.
3. A ngeu-etna (stigma) lian lua ahihziak in, houlimna vantang khawng ah Mental Illness chih thil omthei lua ahihdan, kepdam theih ahihdan leh suicide lungput neihna apat suahtaktheih lua ahihdante khawng genlang zel le'ng lametna kipetuah ding i hi uhi. Lungsim damlouna hi'n suicide lungput neih toh kisai i theihisiamna leh ei mimal mahmah a i na tuakhak leh mualsuah dante khawng genkhe zel le'ng, huaibang tuaklelte a dia huhna pia kisuak ding hi. A phatuam di zawng in houlim in, genkhe tam le'ng, lungsim natna apan damkhiakna di leh suicide doudalna dia panlakna thupitak himai ahi.
  4. Ei hi'n mi hitale uh, Lungsim Natna i neih leh, kepdam theih ahi chih thei a, panpihna zon lit hetlounh ding ahi. Hinkhua haksatak ah mullithuai pipi tuak i hihman un, lungsim a natna leh bahna neite'n panpihna zon zumna leh hatlounhna a i koih hetlounh di uh ahi.
  5. Taksa a i nat chiang unle, insung a i kep damdawite i kinek sek ua, huchia a phat theih keileh, doctor i va naih dan toh kibang thou ahi. Ei-leh-ei a i kikep dam zoh keileh, panpihna zon poisak hetlounh di ahi.
  5. A poimohdan a psychiatrist va naih ding ahih kawmkawm in, Khristian i hihziak tak un, Laisiangthou pansan counselor muanhuai, ahihkeileh Pastor-te i va naih teitei ding uh ahi. I poimoh chiang in panpihna la in, midangte leng kawkmuh teitei ni.
  6. Suicide doudalna di'n, khotaang (school, college leh community centre-te) ah Suicide leh Mental Illness toh kisai kiphawksakna (awareness) avangkim a sai zel ding ahi.
  7. Saptuamte'n leng suicide doudalna ah mohpuak nei i hihdan i phawkta ua, kipahhuai i sa petmah hi. Saptuammite lak mah ah suicide a sihna tung zel ahihdan phawk thak in, Toupa'n mohpuakna hon piak Khrist Sapum i kikepna uah Mental Health leh

Suicide Awareness chihte i sai sutzop zel ding uh ahi.

**Theih dia poimoh:** Kuahiam in suicide lungput a neih khak Chiang in, *Support System* (inkuan hiam, lawm-le-vual hiam, amah theisiamtak a huhna pethei) a neih hoih uleh, va taksuah khollou uhi.

**Khristiante adia suicide etdan thak:** Khristian khotang i hihziaktak un, mahni kithahna leh lungsim damlounhna i etdan uh, i gendan uleh leh i maituahdan uh pahtakhuai hetlou hi. Gimthuakte, gentheite leh panpihngaite tung a itna, hehpihna leh migitna suah dia Bible in hon hilh lou hileh kilawmtak in!

Khristian i hihziaktak un Pathian thu pansan a suicide leh lungsim damlounhate leng i et ding uh ahi. Suicide lungput i chih puuksesa khovel ah bei ngeilou ding ahihna ah, Khrist ah lametna om ahihdan i kikawkmuh ding uh ahi. Tongkhong kisakna leh beidot ziak a kikhitna lungput neih ziak a hin ningkitel chih omthei lua ahihdan i pom di uh ahi. Himahleh, i lungsim a sih utna omziak a mahni deihtelna zang a, va sepkiak di hi hetlou zel

ahi. Hinna hon petu Pathian ahihman in, i hinna pen ei mimal deihtelna neihkhum a suse dia phalna Toupa'n hon pe mawk lou zel hi.

### **Etsakna 1 na:**

*Ecclesiastes 2:17* ah, Kumpi Solomon in "*Hinkhua ka hua*" bang ana chi zawzen hi. Khovel a pilpen leh hausapen, leh nopna chiteng ana chiamkha himahleh, huaibang a hin ningkitelna ana phawk mahmah ahi. Kumpi Solomon thukhitna bang lungput i neih zawk di uh ahi: "*Hiai thu lel a tawpna ahi; a vek in zak in a omta: Pathian laudan siam inla, a thupiakte zui in; hiai lah mihing hihding pumpi ahi ngal a*" (*Ekljiasti 12:13*).

### **Etsakna 2na:**

Jona in Jona laibu bung 3 chang 3 leh 4 ah nihvei tak, '*Kei di'n hin sa'ng in sih a hoihzaw,*' ana chi hi.

Ninevi khaw mite khelhna haihvual hinawnlou asak ziak in, Pathian in amaute kisik a Amah lam a kihei kei uleh, hih mangthang ding ahihdan thu va puangzak di'n Jona sawl hi. Jonah in Pathian' sawlna huphulh lawtel ahihman in, huaibang kampau ana zang hial hi. Ninevi khua ah a utlouhpi



hih dia Pathian in, Jona ana sawl mah bang in, eite'n leng i hinkhua uah uthuai lou pipi thil i tuahte uh Toupa'n Amah lemigel toh kituak a, A hon phalsak vek ahi. Jona in leng, Pathian thu a mang khong bang in, en leng, Toupa lam nga in Amah thumanna mah ah pan la thak le'ng, ahi didan hong om zel ding ahi. *Sam 46:1* in hon hilh mahbang in, "*Pathian i kihumbitna leh i hatna, mangbat lai a huh pahpahpa nai gige ahi.*"

**Thukhitna:** Mihing hihna ah, hun haksa i tuah chiang un, sih utna leh hin ningkitelna lungput neih khak theih mah hi. Himahleh, tua gentehnate bang a, Pathian thu mah pansan a dawnna i piak zel ding uh ahi.

Gimthuakna leh haksatna i chih mi tengteng in athuak uh himahleh, gingtute adia a thawn a thuak kihilou ahi. Toupa'n thuak a hon phalte Amah thupina di leh Amah suun sem dia i khanna dia hon vualzawl sak zel ahi (*Romte 5:3-5 ; 8:28-29*). I gimthuaknate ah Amah phawk kawm i hihleh, Amah min ziak a i thuak suak ahihman in, Van ah gou kholkhawmna leng hong

hipah mai hi (*Philippite 1:29 ; 1 Peter 4:12-19 ; Matthai 6:19-21*).

Mangbat hun leh gimthuak hun tuak zel i hihman un, huaibang hunte ah mahni hinna kilaak utna lungput neih chih omthei mah ahi. Himahleh *Hebrute 4:15-16* a i muh mahbang un, ei dinmun a kibultuah thei Siampu Lianpen, Jesu Khrist nei i hihman un, i hatlouh chiang un, kisuanglah hetlou in, Amah panpihna ngen in A hehpihna mangtutphah i naih ding uh ahi. Huaiban ah, i kiimkiang ah, lungsim a huaibang a haksatna tuak i phawk chiang un, thukhen khum gaihghai lou in, Pathian in hon deih bang in itna toh pan kilaakpih zaw di'n kuapeuh i kiasuan ahi. Bible in hon sinsak "*Na invengte it in*", "*Na puakgikte uh kidawn chiat un*", "*Nou sang in mi a en zaw un*", "*Nou sang in mi koih poimohzaw un*", "*Dahte dahpih un*", "*Kithumpih tuah un*" chihte i zuihna uh hong hipah ding ahi.

Toupa'n A Thu zangkhe thei di'n simtute Jesu Khrist Min in hon vualzawl chiat hen. AMEN.

*(Laigelh toh kisai kupbeh nuam omleh, laigelhtu +919892316430 ah thuzaak theih ding hi.)* ■

# BIBLE STUDY



**Pastor Khamkhanchin Ngaihte**, Local Pastor, EBCC Zion

**Text : Ephesate 6:10-20**

**Thupi : KHRISTIAN GALVAN**

**T**HU MASA: Paul in Ephesa saptuamte kiang a alaikhak hon hialbawlta in thukhah poimawh mahmah hon gen hi. Khristian diktak (bung 1-3), Khristiante hin dingdan tak a hing (bung 4:1-6:9) te niteng a galphual a om hi gige ahihman un Paul in huai galdouna tawh kisai hasotna thu hon gen nawn hi (6:10-20). Laisiangthou tawh kituak Khristian hinkhua tuh galdou hinkhua ahi. Pathian deihna tawh kituak hinkhua in doutu leh daltu (melma) nei gige ahi chih theih chiat ding ahi.

**6:10-13. Toupa leh A thilhihtheihna a hattak a om dia hasotna: 6:10.** Paul in a thugensa teng (bung 1-6:9) sitna leh zawhna ding in hasotna poimawh mahmah hon gen in “a tawppen in” chih in hon pan hi. A malam a Khristian hinkhua a sinsakte a tak a niteng a a hinkhiakpih theihna ding ua thopna poimawh hiai ah hong kilang hi.

Paite ah “...Toupa leh a hatna thagui ah thilhihtheihna nei in hong om un” achi a, English ah, “be strong in the Lord and in his mighty power” (NIV), “be strong in the Lord and in the strength of his might” (ESV), “...in the power of his might”

(NKJV) ahi. A gennop tuh, gingtute amau a hatna om hilou in, Toupa leh a thilhihtheihna hatna a hihhat a om ding chih ahi. Toupa tawh kizop gigena ah hatna om ahizaw hi (Johan 15). Khristiante melma nei i hihman ua tua melma tung a vualzawhna ding a Toupa leh amah hatna a kingak gige a poimawhna hon theisak hi.

**6:11.** Melma nei gingu i hi uh. Melma tung a vualzawhna i tan ding poimawh hi. Tua ding in Paul in hiai ah “Pathian galvan kim in kivan un” achi. “Kivan un” chih English ah “put on” ahi a, silh/silhthuah chihna ahi. A gennoptak ahihleh, kimawlmite’n a kimawl sung

ua uniform a silh zual bang uh hilou, Pathian galvan kim tuh setdet ding a silhthuah ding, damsung daih ding a kithopna genna ahi. Paul in hiai laithon Rome suangkul sung apan a gelh ahi a, suangkul veng Rome sepaihte uniform bukim a kithuam amuh gige apan hiaibang hasotna hon bawl hiding in gintakhuai hi. Pathian' galvan kim tuh Diabol (melma) zekhemnate apan kivenna ding a poimawh ahi.

**6:12.** Khristiante galphual a om, melma nei i hi uhi. Huaiziak in, i melma (i kidoupihte) i theihchet mahmah poimawh hi. Hiai ah Paul in, “i doute” (struggle against) a chihthe tuh mihing bang a mel leh puam nei hilou, lalnate leh thuneihnate, mial tung a khovel vaihawmte, van munte a kha gilou hon omte, ahi uh achi. Ei pau a “i doute” kichi English ah “our struggle” ahi. Paul' thumal zat in a in a gennoptak tuh galvan zang a kidouna ahihsang in kimawlna chikhat 'kibuanna' (wresting) ahi. Wrestling i chih kimawlna chikhat, hoihtak a kichiil a a siam zawzaw vualzawhna ahi. Khristiante melma nei i hi ua, tua melma tuh salam melma hilou in khalam melma

hattakte (supernatural beings) ahi uh. Huan, kibuanna genna thumal ahon zatna ah, hiai kidouna tuh a gal a kidouna hilou in kinaichik mahmah a niteng a kihetkha a kidouna ahihdan langsak hi. Huaiziak in, Pathian' galvan kim a kivat poimawh ahi chi ahi. “Mial tung a khovel vaihawmte” chih in Pathian kalh a khovel thunun sawmtu genna ahi. I melma theihchetna tuh vualzawhna ding kalbi masa ahi.

**6:13.** Muhtheihlough a hat mahmah melma nei i hihman un vualzawhna ding lampi omsun Pathian galvan kim lak a zat ding ahi. Melma zou di'n kisakkhohlna hoih a poimawhna taklat in a om hi. Tang 11 ah, “Pathian galvan kim in kivan un” achi a, hiai ah “Pathian galvan kim la un” achi. A gennop tuh melma dou dia kisakhol, mansa a om chihna ahi. Hiai “Pathian' galvan kim” kichi aban a tang 14-18 ah a kimzaw in hon taklang hi. Pathian' galvan kim lak ding in a tup ahihleh vualzawhna kia hilou a, vualzou a dinkipna ding ahi. Khalam gal douna ah khatvei vualzawh in gen neilou a, vualzawh det ding ahi. Jesu Khrist in setden ding a Khros

a melma ana zawh tak bang a, melma tung a vualzou den ding a lam-et te i hi. Tua ahihtheihna ding a vanzat piak a i om tuh Pathian' galvan kim ahi.

**6:14-17. Melma Douna a zat ding Pathian' Galvante:** 6:14-17 sung ah khalam galdouna a zat ding Pathian' galvan kim kigente a chiangzaw a taklat in om hi. Vanzat dingte et in gingtute khalam galdouna tuh salam galdouna tawh a kibang thei kei himhim ahi chih a chiang hi. Salam galdou bang a dou khak ding thil hithei ahihlai in, thil lauhuaipi leng ahi. Khristiante galvante i en ding:

**6:14.** Amasa in, kawng *thutak a gak* a, a nihna ah, *diktatna awmphaw* zat ding chih ahi. A tup ahihle gingtute a dinkip theihna ding uh ahi. Rome sepaihte kivatnate ngaihtuah kawm a a gelh ahi ding chih ngaihdan khat ahi a, huchih kawm in, Isai 11:5 a a hong paiding Messia kivatna ding a kigen “Diktatna a kawnggak ahi ding a, ginomna a taigakna ahi ding” achi Paul ngaihtuahna a om ahi diam chih in a om hi. Thutak (truth) i chih tanchinhoih (Jesu Khrist ginna tungtawn a Pathian' ta i hihna thutak) genna

ahi. Kawnggak i chih kisakhawl a mansa a omna dia poimawh ahi. Khristian galdouna adia kisakkholhna hoihpen tuh thutak mah ahi. Awmphaw (breastplate) tuh melma vanzat apan kihumbitna ding (defense) ahi. “Diktatna” i chih omdan gamtat a kipumkhatna (integrity) ban ah Jesu Khrist ginna tungtawn a diktansak a omna genna leng ahi.

**6:15.** A thumna ah, *Lemna tanchinhoih vanzat khe a bun a din* (stand) ding. Khalam melma dou ding a mansa a omna ding a poimawh dang khat tuh tanchinhoih ahi. Hiai tanchinhoih Jesu Khrist tungtawn a Pathian leh mihing kilemna thu ahi. Kidouna phual a dingkip dia kisakkholhna a poimawh mahmah Khrist tanchinhoih ahi. Khedap i buh chiang in tuh sepding nei, hawhna ding nei chihna ahi a, kisakkholhna ahi. Ahi a, hiai mun ah kisakkholhna tawh kisai objective genitive case a sim a, tanchinhoih gen dia kisakkholhna genna in la leng a context tawh a kituakzaw ding hi. Mial nasep douna dia a gahsuah (effective) mahmah tuh tanchinhoih genna ahi. Isai 52:7 a, “Tangte a tanchinhoih

tun a, lemna thu tangkoupih a, thilhoih tanchinhoih tun a, hotdamna thu tangkoupih a, Zion kiang a, 'Na Pathian kumpi in atu,' chimi khe a kilawm hi!" a chih lungsim ah hong lang hi.

**6:16.** A lina ah, *ginna lum* (shield of faith) lak ding ahi. Ginna lum a zatna ding tuh migilou thalkuangthei tengteng hihmitna ding ahi. Lum (shield) i chih galvan chikhat, melmate va douna ding hilou in melma apan kihumbitna dia vanzat ahi. "Ginna lum la un" achi a, a masa dangte banglou in hiai ah active voice a kizang hi. Hiai a khalam galvan Paul in a gen tuh "ginna" ahi. A lauhuai mahmah melma vanzat "thalkuang thei" apan kivenbitna ding in ginna a poimawh hi. Hiai a ginna kigen in, Pathian' thahatna a kingakna leh Jesu Khrist ziak a i hihna thak Pathian' ta i hihna theihchetna a kaw k hi. Pathian thahatna leh hihtheihna a kingakna ahi. Huai hunlai a daw i aisansiamna hiam daw i nasep (magic) te hilou in, Pathian thahatna a kingakna ah melma apan bitna leh melma tung a vualzawhna a om hi.

**6:17.** A ngana ah, *hotdamna lukhu*, leh, a gukna ah, *kha namsau* ahi. "Hotdamna lukhu

la un" chih in Jesu Khrist ziak a Pathian'tai hihna nitengahinpih a, Jesu Khrist tawh pumkhat hihna thilhihtheihna a melma tung a vualzawhna leh bitna genna ahi. Hotdamta i hihna in melma tung a thilhihtheihna hon pia ahi. Huan, kha namsau lak ding achi. Huai kha namsau tuh Pathian thu ahi chih a hon hihchian hi. Gingtute galdou ding a hon thuam tuh Pathian thu ahi. Nidang a temsau zang a gal a dou zel bang un, khalam galdouna ah i namsau tuh Pathian thu ahi a, huaimah tuh i vualzawhna ding ahi. Laisiangthou i chih Pathian thu, namsau hiamtuah bang a hiam ahi (Heb 4:12; 2 Tim 3:16). Pathian' thu tuh Khasiangthou tawn a piak ahi. I galphual a i vanzat poimawh ahi.

**6:18-20. Thumna: Khalam Galdouna suangphum: 6:18-20** sung ah khalam galphual a thumna poimawhna Paul in hon taklang in, tuaziak mah a thumna ngai poimawh mahmah ding in gingtute hasuan hi.

**6:18.** Thumna leh ngetna chiteng...bangchik lai peuh a Kha a thum ding, misiangthoute ading a thumna leng limsak ding ahihdan hon gen hi. Thum

dan om thei teng a hun teng a Khasiangthou pina a thum ding ahi. Thumna i chih khalam galdou dia kisakkholhna bulpi (foundation) ahi. Galphual a Pathian hon hihhatna leh thopna leng thumna tungtawn in ahi. Haksat hun, mangbat hun kia hilou a, tuabang hunte hong tun ma a leng, thum ding, ban ah, i thumna in gingtu teng a huam khak gige ding ahi.

**6:19-20.** Hiai ah Paul in, amah mimal nasepna adia thumpih ding in ngetna bawl hi. Amah thumpih poimawh akisakna a hon gen tuh tanchinhoih hangsantak a a gen theihna ding ahi. Ei lawi thumpih poimawh i kisakna ziate utawh a kibang kei hial ahi. Hiai laithon Paul in Rome suangkulh apan a a khak ahi. Maban a Rome kumpi ma a ding a, a tungtang gen ding ngak ahi. Huaiziak a, tanchinhoih a genzom zel theihna dia hangsanna poimawh kisa diak hikha thei hi. Paul in, “thu gensak a ka omna ding in” achi a, huai in tanchinhoih a gen, amah apan suak hilou, a petu om ahihna a taklang hi. Huai tuh, Pathian apan amuh bangbang gen, piak a a om bangbang gen, tuamah bang a a gen zomzel theihna ding a hangsanna poimawh ahi. Pathian a pan suak lou thu dang

gen ding bangmah neilou ahihna leng akilang hi.

Paul tuh “tanchinhoih palai khainiang bun” (chained ambassador of the gospel) ahi. Tanchinhoih ziak a suangkulh tang, sikkol butsak a om ahi. Khovelkhangthu ah, ambassador kichi Chiangte suangkulh a sikkol tawh khum a omlam kitheilou hi. Hiai ah, Paul in a thumal zat tungtawn in, tanchinhoih genna nasep a ngaih thupi dan taklang hi (ambassador). Huchih kawm in, tanchinhoih genna nasep a man piak ngai ahihna leng taklang hi (khainiang bun). Tanchin genna nasepna a etton ding Pathian sikha Paul i neih ziak in Pathian min phat in kipahthu i gen ahi.

**TAWPNA:** Tulai in i gam ah salam galphual a om i hi. Huai kawm in, khalam galphual a om i hi gige chih leng i haih hetlough ding ahi. Salam a i galte theih khelh a lauhuai mahmah a, khalam a i galte theihkhelh khak ding a lauhuai sem hi. Himahleh, Pathian in i galvan zat ding a bukim a hon pia hi. Sum tampi a lei a ngai kei. Jesu Khrist tungtawn a kiningchingtak a piak i hi. Paul bang in, hangsanna suah ni. I zou ding ka ging hi, Kumpipa thahatna na'n dou le hang. Amen! ■



# Gammial Aw

*Amasa in Gammial Aw simtute tengteng i Toupa leh Hondampa Jesu Khrist min in chibai aw! Toupa'n field tungtawn a i kalsuannate hon ompih in tu kumthak a kibulpat theih nawn ding a hun hoih leh manpha honpiak nawn man in kipahhuai i sa mahmah hi. Pawldang toh Toupa gamna i sepkhawmna leh ei sung a i sepnate tungtawn a Toupa'n tukum khat sung a khamangthang tamsem hon piaknawn a, gah kipahhuaitak muh ahih nawn theihna ding in saptuam mite naaksem a thumna leh thilpiak a pang nawn ding in i kichial hi. Thumna leh thilpiak a i pan zelnate thawnlou ahindan field report tungtawn a muh theih zel a omte ziak in kipahhuai i sa mahmah a, hun hoih i neihlai a tamsem sep ahih theihna ding a thumna a naaksem a pangzel ding in i kingen hi. Toupa'n field a i kalsuannate tungtawn a gah hon piakte leh semtute kalsuannate apan kipahthu genna ding leh thumna a delhzui ding anuai ate enkhawm nawn ni.*

## **A. HIMALAYAN MISSIONS FIELD**

### **KIPATHU GENNA LEH THUMNA DINGTE:**

1. Toupa'n field sung a semtute sepna station tuamtuum apan gingthak 08 leh baptisna tangthak mi 07 hon penawn hi. Khateng a i thumna leh nasepnate tungtawn a gah kipahhuaitak gingthak leh baptisna tangthak muh ding om zelte ziak in kipahthu gen ni. Gingthak leh baptisna tangthakte khalam a hattak leh hangtak a hong kalsuan theihna ding un Khasiangthou pina leh makaihna ngetsak ni. Inkuan leh khotang a hihbuaitu bangmah a omlouh a, hangsantak a kal a suanzel theihna ding un leng thumpih ni.
2. Semtute'n Khristmas leh Kumthak Programme hunsung a Ministry a neihte uh buaina omlou a lamzangtak a zouthai ahihman un kipahthu gen ni. Hiai hun a tangthupha kigente, a za tute lungsim ah khasiangthou in na hon sep a, mi tampite Jesu khebul a hong tun theihna ding un thum ni.
3. Taplejung Biakin zoh leh zaththeih ding a omtak toh kiton in January 08, 2025 in Rev Dr Thangminlun Mangte, Field Superintendent in Pathian kiang ah latna leh honna nei hi.

- Saptuamte'n Pathian Khasiangthou ompihna toh lamzang leh nuamtak a biakinn a luahlum zel theihna ding un thumpih ni.
4. Field in sepsuah ding a geelsa a aneih tukum sung ngei a NEBC sung a heutu makai ding sehkhiaak ding a sawm uh buaina omlou a lamzangtak a hon sepsuah ua, Toupa'n heutu makai ding mi muanhuai hon piakna ding in thumna in laan ni.
  5. Semtute'n Pathian apan vualzawlna, khamangthang veina leh lainatna tamsem a tan ua, Khasiangthou thopna toh manphatak a kal hon suan theihna ding un thumpih ni.
  6. Kum paisa sang a semtute'n tu kumthak a salam, lungsim leh kha chidamna hoihzaw toh Pathian gamna hon sepzom theihna ding uleh Toupa apan sepsiamna leh hihtheihna a tan chiat theihna ding un thumpih ni.

## **B. DHEMAJI MISSIONS FIELD**

### **KIPAHTHU GENNA LEH THUMNA DINGTE:**

1. Semtute'n Winter Ministry pansan in Station chih a ginglou tampite lak ah Pathian thu tangkoupah a kalsuan thei ahihman un kipahtu gen ni. Winter ministry pansan a ginglou sukkhak a omte'n Pathian tak a hon muh theihna ding un thumna ah delhzui ni.
2. EBCC Kapurdhuwa biakin puahthakngai a om leng puahthak zoh hita hi. Kipahtu gen in, gingute'n manpha leh nuamtak a biakkhawmna a neihsom zel theihna ding un saptuam mite thumpih ni.
3. Namgharia, Lachangaon leh Bitarbacha a gingtute apan sawm-a-khat pethak ding kibehlap thei zel ahihman un kipahtu gen ni. Toupa'n thilpiak petu ding tamsem hon piakna ding in thum ni.
4. Field a gingtu omte'n a ginna uh suling thei ding a a theihte ua pan a kihepkhiaak ua, Jesu Khrist a ginna a neihsom uh khaksuah mailou a kiptak a hon letkip paisuak ua, ginna a khang leh piching hong theihna ding un thumpih zel ni.
5. Field a semtute'n a etkai uh station khenkhat heikual a om ahihman in mathak la a kuanding semtute'n Toupa kha ompihna toh gahsua leh lohchingtak a kal a suan theihna ding un thum ni.

## **C. HOJAI MISSIONS FIELD**

### **KIPAHTHU GENNA LEH THUMNA DINGTE:**

1. Field a semtute kalsuannate a nawngkaisak thei tampi om himahleh Pathian ompihna toh Hojai station a semtute'n dalna



leh haksatna omlou in Tanchinhoih puanzakna semzom thei uh kipahthu gen ni.

2. Hojai leh Lanka Station pansan a semtu omte'n Winter Ministry ginglou mi bangzah hiamte lak ah semkhethei uh kipahthu gen in, sukkhak a om gingloute'n Pathian hing a muhna ding un thumpih ni.
3. Semtute'n Pathianni Chiang a biakkhawmna a neihzel uh dalna omlou in paizom thei zel, gingu kep a omte khalam pichinna ding leh salam damna a ngahna ding un thumpih ni.
4. Hojai leh Lanka ah ginglou naupangte lakah Home Tuition tungtawn a semtute kalsuanna daltu omlou a lamzangtak a hong paizom zel theihna ding in thumna in phawk ni.
5. Lanka station ah Ms. Purnima Devi kichi semtute'n counselling neihpih lel uh thumna toh delhzui ni. Ban ah, Ms. Laxmi Devi leng dawi in a sukbuai ahih gintang ahihna ah Pathian in atung ah lamdangtak a na hon sepsakna ding in in thum ni.
6. Hojai station ah semtute'n tu kumthak sung a naktak a gingu a kepte lak ua tanchinhoih genpih a sawm uh lamzang leh lohching a hon sepsuah theihna ding un thumpih ni.

#### **D. GOALPARA MISSIONS FIELD**

1. Semtute'n maban ah First Aid Project tungtawn a sep ding a neihte uleh vaisai ding tuamtuum a neihte uh lamzang leh feltak a hon saizom theihna ding un thumpih ni. Hiai Project tungtawn a field a tangthupha naktak a puanzakna ding a vanzat manpha hong suah theihna ding in thumna toh delhzui ni.
2. Dhupdhara station ah Football coaching tungtawn a tanchinhoih gentheihna ding kong hong kison a, naupangte leh anu-le-pate utoh kizopna hoihtak neih ahih theihna ding in thum zom lai ni.
3. Field a semtu nih i neih Evan NKNaulak leh Evan Kamkhenthang te'n khamangthangte itna leh veina toh hon sep ua, gah kipahhuaitak muh ahih theihna ding in thumpih ni.

#### **E. KAMRUP DISTRICT**

##### **KIPAHTHU GENNA leh THUMNA DINGTE**

1. Toupa ompihna toh semtute'n a maban chiat uh sunzom in kalsuan thei zel uh kipahthu gen ni. Pathian Khasiangthou ompihna toh gahsuahtak a kal hon suan zel theihna ding un thumpih ni.

2. Khristmas Project tungtawn a semtute'n houlimpih a neihte uh bohzui ding omte maban a lamzangtak a hon sutzop theihna ding un thumpih ni.
3. Semtute'n a kalsuanna tungtawn ua tangthupha genpih theih ding a neihte uh lamzang leh gahsuahtak a hon sepzui theihna ding un thumpih ni.
4. Loharghat station ah Robin Rabha, Pokanto Rabha, Torabati Rabha leh Pius Tanti-te toh kizopna hoihtak bawl ahihnung in tangthupha genpih theih in omta, kipahthu gen in thumna toh delhzui zel ni.
5. Chhaygoan leh Bamunigaon station tungtawn a Pathian gamna sepna keklet hong hih a, gingthak piak a i omna ding in thum ni. Ban ah, Assam Solkar in Missions nasepna sunawngkai ding zen a vai a hawmlouh a zalentak tangthupha puanzak ahih theihna ding in thum ni. ■



## DORCAS *Corner*

A chitna leh lainatna toh hon makaih gige pa Pathian leh Hondampa Jesu Khrist min in itna chibai k'on buk hi.

Hehpihna ziak a ginna tungtawn a hotdam na hi uhi; huai leng noumau a suak ahi kei a, Pathian thilthawnpiak ahi (Eph.2:8). Hiai Bible chang hotdamna toh kisai a a poimoh penpen ahi. Hotdamna pen Pathian a kipan thawnpiak liauliau, ginna tawn a i tan ahi hi.

Mihing hinkhua ngeina dan in khelhna sisan a pai aom, mahni hoihna leh hihtheihnate zang a Pathian hotdamna manpha tanzoh vual ding hilou hi. Himah leh Pathian mah in a lampi ding hon bawlsak a hoh hehpih mahmah ziak in a Tapa Jesu Khros ah hong thuaksak a, huai a hehpihna eite'n ginna tawn a i san leh hotdamna tangthei phet i hi. Pathian Tapa ginna tungtawn a sangte gingtu, Pathian itte i suak hi. Gingtute Pathian deihbang a kihehpihtuah ding, i mihinpihte'n a muhtheih ding uh hehpihna latsak ding i mohpuak ahi.

**Hotdamna Thawnpiak ahihdan:** I changtel in kichiantak in hehpihna ziak a ginna tawn a hotdam na hi uh, noumau a suak

ahi kei; Pathian thawnpiak ahi chi hi. Hotdamna thawnpiak kichi banghiam ei lampang a suan ding om a tan ahi kei, a thawnpetmah, i sep ding kamsiam hiam, hauhman hiam, thil hoih hihziak hiam a i tan hilou hial hi. Phetlou in mi tengteng kiang a a kibang a tantheih hi zomah, bangchi zongteng in zawng in, mite' nelhsiah in om mahle'hang le, i mel hoih kei in i khosakna niam leh leng Pathian hotdamna ginna tawn in kitang thei veve hi. Thilpiak tengteng lak ah manpha penpen hi. Mi tampite'n thilpiak thupi, mantam leh amau ngaih a hoihpen a a theihte uh, a mi deihsakte uh kiang ah pezel uhi. Himahleh Pathian hotdamna a thawnp bangbang a manpha khovel mihingte lak ah kuaman pezoulou hi.

**Ginna nasep dan:** Ginna i chih hotdamna a thawnp a i tan ding i muhtheihna ding a a loutheilou thil ahi. A ziak bel Bible in ginna tawn in chi sese hiven. Pathian hehpihna ginna tawn a hong luang i hinna a hong luanglut a hotdamna honpuak ahi. Huai pen eimah in i bawlkhiak theih hilou, Pathian kha mah in eimah a hon theihsak a thawnpiak hon piakna ahi.

**Mihing hihtheihna tellou:** 'Huaileng noumau a suak ahikei' – hotdamna eimah hihtheihna leh siamna ziak a tan hilou a hihdan gen hi. Thilhoih hihziak hiam, mihoih ziak hiam in hotdam kihi ngeingei lou ahi. Mi tampite'n thilhoih hih leh amau hoihna ziak in hotdam kisasek mah leh uh, Bible gendan toh kituaklou hi. I hotdamna pen Pathian hehpihna leh a hon lainatna kia ah kinga ahi.

Pathian hotdamna i tan pen i kisuanpih leh kisaktheihna ding omlou hi. A itna leh lainatna ei lampang a a thupiluat ziak ahotdam hilel i hihman in, tuabang itna, lainatna midangte tung ah langsak dingte i hizaw hi. Samari mihoih in suamhat tuakpa a meltheih ngeite hilou, amah sungkuante leng hisamlou napi in panpihngai, liam a om a muh in amah a Pathian hotdamna leh itna a tan pen suamhat tuakpa tung ah hehpihna langsak in a kem dam hi. Suamhat tuakpa a ding in a inveng naipen Samari mihoih ahi. Samari mihoih bang a hehpihna gingtu dangte kiang a i latsak gige ding ahi. Pathian thupiake zui in, kingaihniamna toh i hotdamna semkhe ni. Khelhna ziak a hingtaklou, siding laite a man hon itziak a hong zongkhia a hotdam i hihtheihna ding lampi hon bawlsak a thawnpiak thupi a Tapa Jesu Khrist in khelhman pia

Khros a hon zohsak vekta ahihman in amah nungzui in a deihlam sem ni. Ama' itna leh lainatna koppih in midang i gingtu hihpihte tung ah hehpihna nei in panpih ngaite, lungkhamte hehnem in a deih lampi ah midangte ding a vualzawlina hithei ding in hehpihna lampi tawn ni. ■



## YOUTH *Corner*

### **KIKNAWNNNA POIMOH (Sam 25:4-12)**

Pathian zahngaihna leh hoihnate ziak a tuni chiang dong a hehpihna leh hotdamna hun manpha piak a i om man in Pathian min thupi phat in KTZ simtu tengteng itna chibai ka hon buk hi.

Jawlnei Jonah in Pathian sawlna nial mahleh, nialchi a hihlouhdan phawk in, a hihkhelhna apan kisik in kipethak hi. Thadah takmai in thu tawmkha gen mahleh Pathian in thupitak in zang a, Ninevi khopi khelk kiphawkna leh kisikna tun a, Pathian ngaihdamna ngah loh uhi (Jawlnei Jonah laibu bung 1-4 sim in). Sawltak Peter in a thuchiamte zuausan a, dawiloktak in a ngamatna nnasep ah kikhawn mahleh, Jesu sapna za in a itna masa ah hong kikhawn a, sihding khtakna bei keuhkeuh in, a hinna pumpi Pathian vanzat thupi hongsuak hi (Johan gelh bung 18-21 sim in). Eite zong amaute banga Pathian apan i nungtolhna leh taimangna hinkhua apan kikhawn poimoh hi.

#### **1. Pathian toh kinai gige dia kikhawwnna poimoh hi.**

Toupa saptuam lak ah chiklai peuh a Paathian toh kinai gige a, a deihdan thei khial lou a, i niteng hinkhua le hi zuih lampite etchet jel poimoh ahi, tua ding in a polam a kitehna leh etna hilou in hiai thil lite – Laisiangthou sim, thumna, biakna leh thilpiak – a limsak gige kul hi.

**a) Laisiangthou sim limsak gige ding a kikhawwnna (1 Pet.2:2):** Mihingte hinna, chidamna leh khanna dia ann niteng a nek gige a kul bang in Laisiangthou thutak, bangmah toh hellouh,

hotdamte ading a khalam Ann ahi. Niteng a sim gige in khalam ah chidamna, thahatna, khanna, pichinna leh gahsuhna hon tun dia, Pathian toh hon kinaisak gige ding hi (v.2; cf. Sam 119:105). Pathian thu khawnvak a zang in i zuih lampi a vaksak le kupal hiam kisuikha hiam a omlou ding i hi.

**b) Thumna limsak gige ding a kiknawwna (1 Thes.5:7):** Mihing chidam minute khat in 20 vei khawng a nak hi. Tua ziak in huihsiang dik in, a taksa leh hinna chidamsak a, khangsak a, thahatsak hi. Tuabang in hotdamte' thumna tuh khalam a dia Nakna ahi. Khalam a ahiding bangtak a nak gige chidam, khang, thahat leh gahsuh ahi uhi. Salam a nak louste misi ahih bang un, khalam a nak louste zong a si toh kibang, bangmah hihthei lou, ahi uhi. Jakob in 'Midiktat thumna in thil thupitak a hih zel' a chih in, thumna limsak gige Khalam a thil thupi taktak hihte ahi uh chih hon theisak hi (Jakob 5:16).

**c) Biakna limsak gige ding a kiknawwna (Heb.10:24-25):** Mimal a biakna, inkuan a biakna leh Mipi biaknate limsak gige mi tuh Khrist nungzui, lohching leh gahsuh ahi. Singkhuah amah kia in a kuang taktak theikei a, nih-le-thum i khul khawm Chiang in a kikuantoh uhi. Biakna tuh Pathian kiang a toukaina ahi a, biakna limsak mi'n Pathian thupina phawka zahtak in, a hinna leh omdan in a pahtawi hi. Tua in siangthouna, diktatna leh itna hinkhua a tun hi (Is.6:1-9).

**d) Thilpiak limsak gige ding a kiknawwna (Jn.1:1-5,14; 3:16; Is.53:10; Rm.5:6-8; Philp.2:7- 8):**

Khrist in itna ziak a a hinna hongpiak hilhial leh Khrist na itna ziak in bang na pethukta a (Lk.2:15-20; Mt.2:1-12; Heb.11:13-16,32-39). Pathian thilpiak thupitak ziak a na piakkik ngeingei Pathian hon lamet om hi (Sam.24:1; Haggai 2:8; Diut. 18:4, 12-13,17-18; Lev. 27:30). Piak ngeingei ding ziate theitel a piak kul hi (Numbers 18: 8-15, 20-21; 7:37-38; Diut. 14:28; 2Tm. 2:21; 1 Kor.9:4; 1 Tim.5:18).

**2. Itna masa a kiknawn dia kiknawwna poimoh hi.**

Khasiangthou ompihna a Jesu hondampa dia saan hun a, Amah deihbang a hing dia siit neilou a kipiakkhiakna, Itna

masa a omna ahi (Kil.2:4a; Mt.22:37). Lasiangthou sim, thumna, biakna, thilpiak leh sep-le-bawl a Pathian toh kithuah a om nuamsa a, Amah itpen, ngaihpen leh kinaihpihpen a nei mi a itna masa lenkip mi ahi (Jer.2:2).

- a) **Itna masa tawpsan hihkhak theih ahi (Kil.2:4b):** Pathian i itna leh a gam nasepna a i kithalawpna hong mual gawp a (vv.2-3; Lk.10:38-40), eimah angung khualluatna (Mt.10:37) leh khovel thil tuamtuamte itluatnate'n (1 Tm.6:10; 1 Jn.2:15-17) hon tup chiang in, itna masa tawpsanna dinmun a om i hi. Hiai dinmun phawkkhiak a baihlam hetkei hi (e.g. Jer.23:26).
- b) **Itna masa a om nawn Makai hi dia lamet i hi (Kil. 2:5):** Bah hun leh puk hun omzel mahleh, pukna laitak thei a, a sandan (height) phawk a (v.5a; cf. Diut.6:5), kisikna taktak nei a (v.5b.; cf. 1 Jn.1:9); limsak nawn louhte, thadah leh khelhl ziak a tawpsansate, lungsim khek a hih nawnna, itna masa a om nawnna ahi (v.5c.; cf. Sm.1:1-3; 119:105; Jn.13:36-38; 18:15-27; 21:15-19). ■



## CHILDREN'S *Corner*

### NAUPANG SUNDAY SCHOOL

Saptuam neitu i Toupa Jesu Khrist ahi a, a pumpi ahi, a it mahmah, a sisan a a tat ahi a, huai tuh- a hinna pe phal khop hial a a it- chihna ahi. Tua pumpi sung ah omkhawm himah lehang Naupangte'n chituamna mahmah a neih ziak un, biakkhawmna leh a thutak kisinna, pichingte toh neikhawm lou in muntuam ah kinei hi. Tua mun tuh "Naupang Sunday School" kichi a, EBC Saptuam i poimohngaih mahmahte lakah khat ahi. Hiai mun ah Saptuam sung a khalam a mi muanhuai mahmah mi bangzah hiam kisepkhiate'n naupangte khalam thute sinsak in Pathian biakna neipih zel uhi. Naupangte' chituamna i gen bel bang dang hilou in, pichingte bang a Khrist pumpi hihna miziate (Pianthakna, biakkhawm zia, leh a dandang) nei/siam nailou uhi. Tua Khrist

pumpi hihna miziate, a diak in khalam hotdamna bang hon neih ua, Toupa Saptuam a ding a manpha leh kithalawptak a Pathian bia leh a nasem ding a sinsakna tuh Sunday School omna san ahi hi.

### **NAUPANGTE ADIA SUNDAY SCHOOL KAI POIMOHNA ZIAKTE**

Kum 2025 kum bul ah ding a, Sunday School khawng pantou thei a i omlai man in kipahhuai i sa mahmah hi. Hiai bang hun ah i tate Sunday School a kei teiteina ding ua nu-le-pate'n leng pan nakpitak a i lak ding uh deihhuai hi. A phamsa, heutu manphatak (L) Rev. V. Khamvum in "Khristian Sinsakmi" kichi laibu a gelhna ah, naupangte adia sunday school kai a poimohna ziak point 10 ana gelhkhiaik a om a, tuate poimoh leh theihkuak sa in hiai ah i taklang hi.

1. Naupangte Khrist kiang a pi theihna hun pimohtak ahihziak in.
2. Tuni a naupang na sinsakte zingchiang a amaute mizia ding ahihman in naupang Sunday Skul poimoh hi.
3. Tuni a Sunday Skul naupangte zingchiang a gam-le-nam leh Saptuam makaitu dingte hong hi ding ahihman un poimoh hi.
4. Sinsakna diklou a tamtak man in naupangte a di'a leng pilvan ngai in, Sunday Skul i kisinsakna omsun poimoh mahmah hi.
5. Sunday Skul hoihtak a neihna in Saptuam hatsak ahihman in poimoh mahmah hi.
6. Biakin a i thugen tampite naupangte' a di'a sanglua leh batphak haksa ahihziak in.
7. Inkuan tampite ah Pathian thu a kisinsakna nei theilou ki-om ahihman in poimoh hi.
8. Siamsinna skulte ah Pathian thu toh kisai subject kiguang mahleh tuate kia Pathian thu sinsakna ding a deihkhop huai lou ahihziak in poimoh hi.
9. "A paina ding lampi ah naupang chiil in, huan a upat hun nangawn in huai akipan a pial kei ding," Laisiangthou in chi ahihman in. (Pau. 22:6).
10. Jesu'n, "Hiai mineute lak a khat manthat leng na Pa uh van a om deihlam ahi kei," chi ahihman in (Matt. 18:14).

Kumbul a kipan hoihtak leh damtak Sunday School kaisuak thei ding in Toupa'n hon ompih chiat hen aw!





# EBC Innsung Thu

BCD Lungchin in Year Plan a ka guan bang un Pathian kha polhna leh ompihna tang in December 20-22, 2024 sung "2nd BCD' Annual Day-cum-Gospel Winter Meet 2024" hun lohching leh gahsuahtak in ka zangthei uhi. Hiai hunzatna sung in "Pathian Thilthawnpiak Nangmah a Ompen Mutkuang In," (2 Tim. 1:6) chih thupi pansan Local Chairman Upa Lalthamuan, Local Secretary Upa Sungthanmuan leh Evan. Teacher Nengpiakson Samte in thugenna hun manphatak zang uhi. Programme zatsung in Naupangte ading bik in kitaitehna tuamtuam sai in om a nuam in manpha mahmah hi. Pawlam vai leng sai in om a, numeite a leh pasalte a football sai ahihban ah item tuamtuam leng sai ahi. Khosung/Saptuam mipi'n itna Annkuang leng sawkkhawm ahi.

Hiai programme zattheihna dia BCD min a STICKER bawl a om in EBC Lamka North Division, Lamka South Division & Singngat Division sung leh mimal phatuam ngai tuamtuamte kiang zuak in om a, ka haksatna uh hon theihsiampih a Pathian min a honna laksak siausiaute ziak a hiai bang program zangthei a om ka hihman un, ka kipahna uh i KTZ deihtohtak ah kon taklang uhi.

Koute haksatna tung a theisiamtak a Pathian min a panpihna hon pete Toupa'n a leh tampi'n a vualzawlina noute a hon hisak jel hen chih ka thumna leh kipahthu genna uh ahi.

BCD Lungchin sik in,

- M Nenglianmang, *Superintendent, BCD, EBCC Lungchin*

## **Himalayan Missions Field Report**

Simtu deihtakte Kumthak 2025 chibai, Jaimashi!

Toupan HMF sung a sepding honpiakte sem a kal i suantouh zel lai in, kha lam a gah honpiak zelte ziak a kipahthu gen kawmkawm in, a tate poimoh nelhsiah saklou a sa lam poimoh toh vualzawl



zel pa Pathian tung ah kipahtu gen kawm in, Amin thupina ding hi hiai ah Report saulou k'on gelh hi.

Taplejung a gingtu i neihten, mi inn luah a biakna kinei zel pen, tunung ding etna a mahni Biakin ding neih hi henla, Biakin ei a mahmah om thei leh chih lunggulhna hon neihtheih utoh kiton in, Headquarters a heutute deihsakna leh thumtute thumna Toupan hon dawng in, a mun ding honpiak zoh, nisim 16th July 2023 ni'n Biakin bawl/nasep pat ahi. A Biakin kilam letdan ahihleh 40x16 (adung le vai) ahi. Tulel in member a simtheih mi 37 vel dan in kichiamteh lel hi. Hiai mun pen singtang khopi, District headquarter khat ahihman in mun poimohtak ahihban ah, Toupa vualzawlna toh maban ah khanlam manoh zel ding lamet ahi.

Hiai building pen a tung Biakin ding leh a nuai semtu quarters ding a geel ahi. Tu'n sum le pai taksapna ziak in anuai semtu tenna ding (quarter) pen zohlouh in om tadih lai mahleh, Biakin pen zat kin ding utna ziaikin nisim 8th January 2025 sunma dak 11:00am in Rev Dr Thangminlun Mangte, FS in Pathian khut ah latna leh Biakin honna neih zoh ahih toh kiton in zat hita hi.

Toupa'n a kul le poimohte hon suktuahsak a, semtu omna ding pen leng zoh pah a hong hihtheihna ding in thumna toh delhzui ni maw. Toupa'n thupina tengteng tangta hen!

*Ka kipak, Agam a dia na seppih uh,*

- Rev Dr Thangminlun Mangte, *Field Superintendent, HMF*

## **MISSION COMPOUND BIAKIN KIPIAKNA LEH SILVER JUBILEE LOPNA**

TE Paul Memorial Chapel, Mission Compound ah EBCC Mission Compound in biakna kum 25 (Silver Jubilee tan in) a na kinei hi. Himahleh, hiai Biakin pen neitu hihna Evangelical Congregational Church of India (ECCI)' a ana hidenlai a hihman in amau kiang ah neitu hihna a kingen hi. Amau leng lem honsakpih in January 10, 2025 dak 2:00 PM in EBC Headquarters heutute theihpih in piakkhiakna hong nei uhi.

Hiai hun a kilawmtak a saankhiakna hong omtheihna ding in EBC Headquarters leh Division, Lamka South Division in pan nasatak a hon lakpih in tha-le-zung leh seen tengteng seng in program zatna leh ankuang umkhawmna kineithei a kipahhuai kisa mahmah hi.

EBCC Mission Compound Silver Jubilee (2000---2025) kipahthu genna program January 15,2025 (Nilaini) in nuam leh manphatak in kizangzou hi. Hiai hun a thugentu Rev. K. Kamchinkhup General Secretary; suangphuh honna leh latna Rev. N. Thawndoulia Director (Ms); souvenir honna leh latna Rev. M. Zalian Guite Director (Mn); EBC Central Choir in lapawl manphatak hon saksak ua program nuam tuan mahmah hi; amau teng banah chial bang a Saptuam ngaina a hong uapte tengteng tung ah ka kipak mahmah uhi.

A tunga programte a hong kihelkha leh hon makaih heutate, sound nuamtak hon zangsak EBC Headquarters, video coverage hon bawlsak Uptown Media, sum zonna-a hon panpih a van zuakte hon leisak pawlpi leh mi malmalte leh panpihna ankuang hong umsakte leh thumpihtute tengteng i Thukizakna tungtawn un kipahthu k'on gen uhi. Pathian leh noute tungtawn a program lohchingtak a kizangzou a hihman in Toupa'n thupina tang henla a leh tampi in hon vualzawl hen aw.

- Upa Nengsong Ngaihte, *Secretary, TBUC M/Comound*

## EBC SUNG A DIVISION KIKHENDAN LEH KHUATE

### 1. LAMKA NORTH DIVISION

☞ Divisional Superintendent - **Rev. L Khaikhansong**

<i>Saptuam</i>	<i>Inn</i>	<i>Saptuam</i>	<i>Inn</i>
01 B. Kaljang	30	07 Tuithapi	35
02 Central Lamka	232	08 Zehang Lamka	210
03 Hiangtam Lamka	320	09 Chiaugal Z. Lamka	14
04 Immanuel HQ Veng	93	10 G. Mawnglian	67
05 Saikul	20	11 Lailam Veng	130
06 Tuitengzang	17	12 LBC H/Lamka	138

☞ ***Inn agawm - 1,306***

**2. LAMKA SOUTH DIVISION**☞ Divisional Superintendent - **Rev. T Thangziam**

<u>Saptuam</u>	<u>Inn</u>	<u>Saptuam</u>	<u>Inn</u>
01 Kanaan	386	08 Mualpi	32
02 Nghathal	125	09 Thingkangphai	20
03 Tangnuam	167	10 D. Leikot	52
04 Lanva	76	11 Lamzang	39
05 G. Mualkawi	243	12 Mualtam	16
06 Mata	132	13 Gelzang	06
07 Vaal Veng	115	14 Peniel	190
		☞ <b>Inn agawm - 1,599</b>	

**3. LAMKA WEST DIVISION**☞ Divisional Superintendent - **Rev. Pumsuanmung Naulak**

<u>Saptuam</u>	<u>Inn</u>	<u>Saptuam</u>	<u>Inn</u>
01 Mission Compound	39	08 Bethany, Zoar Veng	199
02 Bethlehem	168	09 Bungmual	468
03 Hebron	295	10 D. Phailian	27
04 Dorcas Veng	438	11 New Lane Bungmual	168
05 Takvom	12	12 Zoan Phailian	31
06 Pearsonmun	205	13 Tonglon T	18
07 Moriah EBCC	194	14 Tonglon P	12
		☞ <b>Inn agawm - 2,274</b>	

**4. LAMKA EAST DIVISION**☞ Divisional Superintendent - **Rev. N Tuang Lang**

<u>Saptuam</u>	<u>Inn</u>	<u>Saptuam</u>	<u>Inn</u>
01 G. Gamphazawl	22	08 Elim Veng	158
02 P. Jordan	10	09 Vengnuam	466
03 Phaisan	05	10 V. Munhoih	165
04 T. Khuangkhai	42	11 College Veng	141
05 Zion	374	12 Khominthang	259
06 Pethuel	352	13 Hermon	133
07 Jordan	116	☞ <b>Inn agawm - 2,243</b>	

**5. AIZAWL DIVISION**☞ Divisional Superintendent - **Rev. S Thang Johnson**

<u>Saptuam</u>	<u>Inn</u>	<u>Saptuam</u>	<u>Inn</u>
01 Dinthar, Aizawl	191	03 Thuampui Aizawl East	35
02 Aizawl South	56		
		☞ <b>Inn agawm - 282</b>	

## 6. MIZORAM (SIALKAL) DIVISION

☞ Divisional Superintendent - **Rev. V Goubiakmuan**

<i>Saptuam</i>	<i>Inn</i>	<i>Saptuam</i>	<i>Inn</i>
01 Mimbang	224	06 Khawkawn	32
02 Gilgal Mimbang	88	07 Vaikhotang	31
03 Teikhang	142	08 Vengnuam Teikhang	27
04 Hiangmun	46	09 Selam	02
05 Kawlbem	72	☞ <b><i>Inn agawm - 664</i></b>	

## 7. VANGAI DIVISION

☞ Divisional Superintendent - **Rev. Dr. M Khamkhanchin**

<i>Saptuam</i>	<i>Inn</i>	<i>Saptuam</i>	<i>Inn</i>
01 Khedagar	07	04 Silchar	30
02 Buangmun	37	05 Vengnuam Jiribam	20
03 Chingmun	13	06 Mission Compound	19
		☞ <b><i>Inn agawm - 126</i></b>	

**Notes:** Chingmun leh Khedagar, gam buai ziak a taidalh uh, Buangmun ah tamlou om zek hi. Jiribam Vengnuam Biakin leh Saptuam inn 23te haltum in om, Jiribam Missions Compound lam miteng puak khiak a om, Sepaihten School building aluah ziak lel ua hawikhak a om lai ahi.

## 8. SINGNGAT DIVISION

☞ Divisional Superintendent - **Rev. S Khamkhanchin Ngaihte**

<i>Saptuam</i>	<i>Inn</i>	<i>Saptuam</i>	<i>Inn</i>
01 Behiang T (Sialsih)	16	13 Lungthul T	2
02 Behiangjang	13	14 Maukot	2
03 Chiangpi	10	15 Mualnuam	97
04 Enpum	16	16 New Kangkap	37
05 G. Bualjang	24	17 Ngaljang	16
06 Kaihlam	13	18 Sialbu	9
07 Kangkap	48	19 Singngat	168
08 Khuanggin	16	20 Songtal	58
09 Lungchin	22	21 Suangdai	14
10 Lungthul D	37	22 Suangdoh	100
11 Lungthul E	09	23 Thuangtam	20
12 Lungthul L	18	24 Tuilakjang	12
		☞ <b><i>Inn agawm - 777</i></b>	

## 9. THANLON DIVISION

☞ Divisional Superintendent - **Rev. K Pumsuanthang**

<u>Saptuam</u>	<u>Inn</u>	<u>Saptuam</u>	<u>Inn</u>
01 Aibulon	17	09 Sinzawl	102
02 Bukpi	103	10 Thanlon	58
03 Bungpilon	05	11 Bukpi Bethel	10
04 Dialkhai	17	12 Mualpheng	31
05 Hanship	03	13 Zoupi	2
06 Khazang	33	14 Lawibual	01
07 Palkhuang	34	15 Daido	13
08 Phaitong	36	16 NE Tangnuam	44
		☞ <b>Inn agawm - 509</b>	

## 10. KHOPI A SAPTUAM OMTE

<u>Saptuam</u>	<u>Inn</u>	<u>Saptuam</u>	<u>Inn</u>
Bangalore	61	Kolkata	30
Central Delhi	106	Mumbai	39
Chandigarh	10	Shillong	179
Chennai	124	Diphu	23
Delhi	356	Manja	08
Guwahati	181	Dimapur	44
		Kohima	24
		☞ <b>Inn agawm - 1185</b>	■

# Thu Tuamtuum

## KIPAHTHU GENNA:

Mary Chingthiannem d/o Pa K Ginson leh Nu Hauzangai, Zion Veng New Lamka a om in BSc Nursing Officer, Odisha, Bhubaneshwar a om in khaloh lak masak pen Pathian gam nasepna ding in TBUC ah hon piakna tung ah kipaklua ka hihman un ka kipahna uh KTZ ah ka hon taklang uhi. Toupan a sepna leh mailam ah makaih in vualzawl zel hen chih ka deihsak uhi.

- Upa K Thangchinlian, *Secretary TBUC, EBCC Zion*

Mr. M Zenthianlal s/o (L) Chinkhugin, Kanaan Veng, New Lamka a om in electrician nasepna a muh a khaloh lak masak pen Pathian

gam nasepna ding in TBUC ah hon piakna tung ah kipaklua ka hihman un ka kipahna uh KTZ ah ka hon taklang uhi. Toupan a sepna leh mailam ah makaih in vualzawl zel hen chih ka deihsak uhi.

- Upa T Dongkhanthang, *Secretary TBUC, EBCC Kanaan Veng*

Miss Malsawmkim d/o Donzaching Upa Bial No. 9 in Hauzel Diagnostic Centre a Lab Technician a sepna a khaloh lak masakpen Pathian gam nasepna a ding in Tualsung Baptist Missions Committee khut ah hon pia hi. Kipahhuai kisa mahmah in hiai Khristian Thukizakna tungtawn in kipahna ka hon taklang uhi. Toupa'n tamsem pethei ding leh sem thei ding in vualzawl leh chih ka thumna uhi ahi.

- Upa T Khoikhanpau, *Secretary, TBMC EBCC Kanaan*

EBCC Thuangtam, Singngat Division Biakin thak honna December 21, 2024 in Rev. Dr. S. Vung Minthang, General Secretary in nei hi. Rev Thawndoulian, Director of Ministries in Biakin tutnate latna nei hi. Program zat hunsung in Thuangtam hausa Pu G. Chinkhanlian in saptuam' gam lai saptuamte kiang ah piakkhiakna leng nei hi. Biakin thak bawl patna ding in Bialtu Pastor P. Hau Shoute in November 4, 2024 in ground breaking nei a, biakin bawlna toh kisai in saptuam mipi'n social work 7 vei nei uhi. ■



## Ordain Sunna

1. Min: **UPA LIANKHANTHANG LAINGEK**
2. Pianni: June 30 1949
3. Pianna Khua: Ngalgjang, Singngat Sub-Division
4. Baptisma tanni: 1st May 1971  
Baptistu: Pastor PK Englian
5. Pa Min: Songzachin
6. Nu Min: Chiinzaching
7. Zi min: Mrs. Niangluan
8. Kitengsaktu: Pastor Pauzalang
9. Gil a gah goutan neihzah: 6      Pasal: 1
10. Tulel a omna Saptuam: EBCC Vengnuam



Numei: 5

11. Tulel a kizatna: TBUC Member
12. Ordain Kum: December 08, 2002  
Ordain Petu: Rev L Kham Kho Lun
13. Pahtakna lai san kum: December 08, 2019
14. Toupa kiang a tawldam ni: January 05, 2025  
Vui ni: January 06, 2025
15. Vuitu Pastor & Saptuam: Pastor H Biakson, EBCC Vengnuam
16. Natna: Heart Fail
17. A tanchin gelhbeh nop: Amah ahihleh mi taima leh feltak Pathian mai a kitulut gige banah thum mi ahi. Thumkxawmna omnate ah Saptuam leh Khotang vaite ah tel khial ngeilou hi. 2024 Sept. apat lung-am leh thachau in hong puk a damdawi inn ah ki-enkol a hong hoih deuh in inn pansan ki-enkol touden hi. Huchih lai in Dec. khatawp lam in hong buaise nawn a; Jan. 03, 2025 in damdawi inn lutnawn in ki-enkol a omlai 05.01.2025 in Heart fail in damdawi inn ah dak 11 P.M. vel in a tangtawn gam ding ah a Pa kiang zuanta hi.

*Toupa Khasiangthou in a nutsiat a inkuan leh Saptuamte khamuan in makaih zelta hen.*

1. Min: **Rev. H. Vungzalian**
2. Pianni: September 19 1947
3. Pianna Khua: Kangkap
4. Pa Min: Hatlang Langgin
5. Nu Min: Khawlnem Thawmte
6. Zi min: Goihniang (June 23, 2015 a sihsan)
7. Kitenni: June 1969



Kitengsaktu: Pastor Thangsavung

A Zi nawn: Niannghaihkhawl, December 17, 2016 ah, EBCC Pethuel ah Dan Siangthou in kiteng nawn uh.

8. Gil a gah goutan neihzah: 2      Pasal: 1      Numei: 1
9. Tulel a omna Saptuam: EBCC G Mualkawi
10. Tulel a kizatna: TBUC Member
11. Ordain Kum: December 08, 1992  
Ordain Petu: Rev L Kham Kho Lun
12. Pahtakna lai san kum: February 7, 2012

13. Toupa kiang a tawldam ni: January 7, 2025  
Vui ni: January 7, 2025
14. Vuitu Pastor & Saptuam: Pastor Thanglianmung
15. Natna: Colorectal /Colon/Rectal Cancer
16. Lai zilna toh kisai: Kum 1957-1964 sung vel in Kangkap khua a NEIG Mission L.P. School, Mualnuam Govt.L.P. School ah Pawl VIII tan ana zou hi. Huchiin maban suzomtou ding in 1967 in Lamka lam Tuithapi khua a Gang Lamkhogin pansan in Pant Standard High School, New Bazar ah Pawl-IX zou nawn a, Pawl VII-IX sung skul kai gina theilou chih mahtak Pawl X ah tang hi.

A tanchin gelhbeh nop: Himahleh Pathian gam nasepna mah alungtup pen ahih dungzui in, March 1971 in Pastor PK Englian phalna in alawm hoih Rev. ST Jamkhanthang toh Evangelist Skulpu leh Saptuam kem ding a nasem panding in hong kisakhia uhi. June 1981 in PTS Presbyterian Theological Seminary, Dehradun, UP ah (study leave without pay) khaloh nusia in Bible sin(D.Th) ding in hong kisa a, himahleh insung haksatna ziaak in course sinzou manlou in innlam kik nawn hi. Kum 1985 June 20 in Grace Bible College, Gurgaon, Haryana ah March 1988 in Diploma in Theology (D.Th) course vazil zou.

May 2010 in damlounhna ziaak in operation ngai ding in om a, sum leh pai haksatna tuamtuam ziaak a lungkhamtak a omlai in mi kiphalte huhna leh lemgelna in operation theih in om hi. Himahleh a natna medical term in Colorectal/Colon/Rectal Cancer damsiang theilou hi, Pathian ompihna leh Saptuam, mimal leh ngaina mi tamtakte thumpihna ziaak in, kum tamtak hatlou sasa in hon dampih hi. Nikum November leh December lak in hong chau mahmah in Pathian lemgel ahita ding a, Nisim 07/01/2025 Dak-10:37am in amuan Toupa kiang ah nat leh sat om nawnlounhna mun ah tawldam ding in a it a ngaih tampi nusia in honna paisanta hi.

*Toupa Khasiangthou in a nutsiat a inkuan leh Saptuamte khamuan in makaih zelta hen.* ■





**FEBRUARY 2025**

# Kipahthu Genna leh THUMNA DINGTE

**1 KIGINNI:** Khathak hon musak i biak Pathian kiang kipahthu gen in, manpha leh lohchingtak a i zatchiat theihna ding in thum ni. Dorcas Hall a Head Clerk semlel Upa K Jamchinthang damlou kikemlel ading in Pathian hihdamna ngen in thumpih ni.

**2 NIPINI:** Pathian in heutu thak hon piak Rev. K Kamchinkhup, Rev. M Zalian Guite, Rev. Thawndoulian, Rev. Nenglian Vualnam leh a inkuante ziak a kipahthu gen in, Toupa deihna banga Saptuam hon makaih theihna ding un Tuglam apan pilna ngen in thumpih ni.

**3 SEPPATNI:** Division kibawlthakte lepfel ahih a, Pathian Gam nasepna gahsuahtak a malak ahihna ding in thumna ah phawk ni.

**4 SEPNAWNNI:** February 5-12 sung saptuam schoolten kumtawp exam nei ding uh. Naupangte leh sinsaktute adia taksa chidam ngetsak in, a kumkhat nasep uh lohchingtak a hon zohtheihna ding un thumpih ni.

**5 NILAINI:** February 7-9 sung EBCC Sinzawl in Chialpi nei ding a, Evan T Damkthothang thugenpi in pang ding. Khasiangthou pawlna leh makaihna ngen in thumpih ni.

**6 NINGANI:** February 7-9 sung EBCC Sialbu in Hotdamna Chialpi nei ding a, Evan Lianding Guite thugenpi in pang ding, thugentu leh a kihel ding mite Pathian Kha polhna ngen in thumna ah phawk ni.

**7 SINTAWPNI:** Semtute lak a damlou, Pastor H Jamkhanpau leave la a inn a ki-enkol leh Pastor Khupkhansiam te hong dam ua, Saptuamte hon kepzom theihna ding un thumna ah phawk ni.

**8 KIGINNI:** Evan NK Naulak, sinkha a suang om, NEIGRIMS, Shillong a operation lohchingtak a zoh ahihtoh kiton in, damtak in a omna mun, Goalpara tungnawnta, kipahthu gen in, hong damsiangna ding in thumpih ni.

**9 NIPINI:** Semtu kisuankual leh mohpuakna thak laten a sepna munchiat ua lohching leh gahsuahtak a honsep chiat theihna ding un thumna ah phawk ni.

**10 SEPPATNI:** NDPN tungtawn a Pathian Mission i sepna in masawnzal, January kha in Unaunu Jamngaihlu WEC tungtawn in Senegal ana lotta, kipahthu genkawm in thumna in delhzui ni.

**11 SEPNAWNNI:** Tukum a ding a masapen ding in February 12 in CEC meeting omding, manpha leh gahsuahtak a zoh ahihna ding in thumpih ni. February 12-16 sung NTBC, V. Munhoih in Hotdamna Chialpi nei ding a, Evan T Damkthohtang in Pathian thutak gen ding. Chialpi lohching ahihna ding in thumna ah phawk ni.

**12 NILAINI:** Director of Missions mohpuakna lenthak Rev Thawndouliah leh a inkuante ziak a Pathian kiang a kipahtu gen in, mohpuakna thak Toupa ompihna leh makaihna toh honsep touhzelnah ding ah thumpih ni.

**13 NINGANI:** Himalayan Mission Field a semtute, FS Rev Dr Thangminlun Mangte leh a seppihte ziak a kipahtu gen in, Pathian deihna bang a hon sepzom zel theihna ding un thumpih ni.

**14 SINTAWPNI:** Director of Development Rev Nenglian Vualnam leh a inkuante ziak a kipahtu gen in, Pathian deihna banga a mohpuaknate hon sep zohzel theihna ding in thumna ah phawk ni.

**15 KIGINNI:** EBC Central Choir leh Division Choir Toupan hon piakte ziak a kipahtu gen in, amauten Pathian phatna laa siam leh Amin thupina dinga hon sak zomzel theihna ding un thumpih ni.

**16 NIPINI:** Director of Ministries Rev M Zalian Guite leh a inkuante ziak

a Pathian kiang a kipahtu gen in, Toupa deihna bang a a mohpuakna hon sepkhiak theihna ding in thumna ah phawk ni.

**17 SEPPATNI:** February 18-23 sung EBCC Lamzang in Hotdamna Camp, ORC ah nei ding a, Evan T Damkthohtang thugenpi in pang ding. Camp lohching leh gahsuahtak ahihna ding in thumna ah phawk ni.

**18 SEPNAWNNI:** February 19-23 sung EBCC Bukpi in BYF Camp sai ding a, Evan Lianding Guite thugenpi in pang ding. Camp lohching leh gahsuahtak ahihna ding in thumpih ni.

**19 NILAINI:** Development Department akipan B.Ed Training lel Evan. Teacher-ten manpha leh lohchingtak a hon zohna ding un Pathian pina ngen in thumpih ni.

**20 NINGANI:** Mission fieldte a gingtu hong kibehtap zelte ziak a kipahtu gen in, missionary-te tungtawn a Toupan gah tamsem hon piakna ding in thum ni.

**21 SINTAWPNI:** Dhemaji Mission Field a sem Rev T Paununsang, FS leh a seppihte ziak a kipahtu gen in, amaute Toupan tamsem a azat a, khamangthang tamsem Khris khebul a pilut ahihna ding in thumpih ni. Zingchiang in Central Music Sub-Committee makaihna in Mini Auditorium, Dorcas Jubilee Guest House ah lapute toh kithuahkhawmna, kikupkhawmna leh kisinsakna om ding, Thangbiaklal Valte, Music Promoter EBC Sinsaktu in pang ding, manpha leh gahsuahtak a zoh ahihtheihna ding in thumna ah phokni.

**22 KIGINNI:** Tukum in Tuailaite khawmpilian nei ding, Tuailai dinkhiak nung kum 60 chinna leng ahihtoh manpha leh lohchingtak a sai ahihtheihna ding in Youth Coordinator Rev V Thangkhanmuan, CBYF heutute leh hiai khawmpi ding a vaisaite thumpih ni.

**23 NIPINI:** NDPN tungtawn a Pathian Mission i sepkiakna pai zomzel ah, tulel in SIM tungtawn a kuan ding in Thangdinglian in training neilel, lungtunhuaitak a honzoh a, maban a Pathian in amah adia a sehsakna mun a akuan theihna ding in thumpih ni.

**24 SEPPATNI:** Divisional Superintendent-te'n amau adia Toupan a sehsak division sung a saptuamte Amah deihna banga hon makaih theihna ding un thumna ah phawk ni.

**25 SEPNAWNNI:** Saptuam a thumtute leh thilpiak petute ziak a kipahtu gen in, Toupan mi tamsem hon piakna ding in thumlai ni.

**26 NILAINI:** Mission Inn, Khominthang a laisim a om tuailaiten amau toh kituak sepna hon muh ua, Khris Lalgam keklet ahong hihna ding in thumpih ni.

**27 NINGANI:** Dorcas Hall a semtute ziak a Pathian kianga kipahtu gen in, amautea a mohpuakna chiat uh, Pathian lau leh zahtak kawm a hon sep chiat theihna ding un thumpih ni.

**28 SINTAWPNI:** February khatawp hon musak i biak Pathian kianga kipahtu gen in, i hihkhelhnate ah ngaihdam ngen ni. ■

**PROGRAMS OF STUDY**

M.Div ●●● SECULAR GRADUATE TE A DINGIN KUM 3; ATA/SENATE OF SERAMPORE NUIAI A B.TH GRADE 'B' A. ZOUTE ADINGIN KUM 2.

B.Th ●●● KUM 3 SIN DING.

DipTh ●●● KUM 2 SIN DING

**Ministerial Training Course (Galzilna)**  
KUM 2 SUNGA ZAWH DI.

<b>M.Div</b>	<b>Master of Divinity</b> SECULAR GRADUATE OR B.TH ATA/SE-RAMPORE NUIAI A ZOUTE.
<b>B.Th</b>	<b>Bachelor of Theology</b> CLASS XII ZOUSA HIAM DIPLOMA IN THEOLOGY ZOUSA
<b>DipTh</b>	<b>Diploma in Theology</b> CLASS X ZOUSA TE.
<b>MTC</b>	<b>Ministerial Training Course</b> CLASS VIII ZOUSA TE DEIHTUAM BIK AHI.

- Lunglutna neite a di'n Office ah hiam [www.gracebiblecollege.in](http://www.gracebiblecollege.in) ah amuh theih ding hi.
- Ngetna form bukum May 01, 2025 tan in College ah piaklut ding ahi.
- May 05, 2025 ni in Admission Test om dia, May 06, 2025 in personal interview om ding hi.
- DAY-SCHOLAR kila nawnlou ding ahihman in, HOSTEL a omtheiding te vuak in ngetna piak ding.
- MTC (Ministerial Training Course) April 9-July 11, 2025 sung in admission a bawl theih ding.
- A haksia diakte ading in Hostel Scholarship a om hi.

**GRACE BIBLE COLLEGE**  
ACCREDITED BY ASIA THEOLOGICAL ASSOCIATION  
P.O.Box 44, New Lamka - 795006  
Churachandpur, Manipur, India

Postal Regd. No. MNP 07 | Regd. No. 22344/70

**BOOK POST**

If undelivered, please return to

The Editor,  
CHRISTIAN THUKIZAKNA  
P.O. Box-6, Dorcas Hall,  
New Lamka-795006, Manipur, India

